



Tir Yimyim

www.tiryimyim.in


Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com



TAPAK 3

Agatha Sangma-i Rs 1 crore tenlar



TAPAK 7

Kartik Aaryan-i sen crore 1 tenla agütsütsü nangzük

VOL. XVII NO. 152(ADOK 152) DIMAPUR

SANGTENNÜ (TUESDAY) METSÜREMI (MARCH) 31, 2020

5.00

Nagaland nungi sample 22 'negative' putetogo: Kronu

Kohima, March 30 (TYO): Nagaland nungi novel Corona virus indang sample 22 tendangtsü bener yokba ajak 'negative' ta putetogo.

"Nagaland nungi COVID-19 sample 22 ji Assam nung Guwahati & Dibrugarh aser Manipur nung Imphal-i tendangtsü bener yokba liasü," ta Planning & Coordination Minister aser COVID-19 Nagaland atema sorkar otongdar, Neiba Kronu-i tanü ashi.

"Nisung 4,096 tashi kidang

aser quarantine centres balala nung quarantine asüba nungi nisung 502 tashi mapang süiogo aser March 6, 2020 sülen tangalen nungi arur 3,594 tashi quarantine nung lir" ta Dr Suokhrie-ia osang metetdaksü.

Tanü Nagaland Governor R N Ravi-ia DGP, Principal Secretary Home, Principal Secretary Health & Family Welfare aser tanga ketdangsertem den COVID-19 wara indang osang metetpela liasü, ta Minister Kronu-isa metetdaksü.

Dimapur yimdong nung chiyungtsü agütsürtem nem metetdaksür

Dimapur, March 30 (TYO): COVID-19 ajanga Nagaland ajunga shibanga aliba mapang aayangertem, tangalen nungi arurtem, nungdabapurttem aser police nem chiyungtsü agütsürtemi taochi mapa inyakdang sorkari nisung o nisung tsüngda tepila ayutsü latettsüba ama meinyaker, ta Dimapur Deputy Commissioner-i tanü metetdaksü.

Sorkari teinyaktsütem lateta aliba ama aser jila ajunga nung

nungdabapur ajak ayimjemsü atema iba mapa tajung inyakba telok/NGOs-i District Administration den yaritepa dang inyaksangshitsü metetdaksür, ta DC Anoop Khinchi, IAS-i ashi.

Chiyungtsü aser tanga mapa tajung inyakba NGOs ajaki Extra Assistant Commissioner (Dev) mobile No, 7005968695, Deputy Commissioner Office, Dimapur den tongtepa iba mapa inyaktsü mepishir, ta paisa ashi.

April 1 nungi Dimapur nung dokan lapoktsü tetuyuba

Dimapur, March 30 (TYO): Dimapur jila nung wholesaler ajaki April 1, 2020 nungi anepdang 5:00 ako nungi anepdang 8:00 ako tashi dang lapoktsü tetuyuba agütsür, ta Dimapur Deputy Commissioner Anoop Khinchi, IAS-i tanü ashi. Paisa, Dimapur nung essential

commodities ayokba dokan ajak April 1, 2020 nungi anepdang 9:00 ako nungi nikongtsütsü 2:00 ako tashi dang lapoktsü metetdaksü.

Ajisüaka, mozü ayokba dokantembo anepdang 9:00 ako nungi akhi lapokba mapang tashi lapoktsü melar, ta Anoop Khinchi-isa ashi.

Sorkar school tesayurtem dang metetdaksür

Dimapur, March 30 (TYO): Coronavirus wara ajanga tenokdangba balala agüja aliba mapang Nagaland Department of School Education (DoSE)-i online services kar tenzütsü sentong lir.

Iba dak sendakba nung Department indang website 'education.nagaland.gov.in' nung Govt. School Teachers (PGTs maden) indang registered mobile numbers tatabangba digit 4 enokja lir aser itemji tesayurtemi jangjateptsü.

Tesayurtemi mobile number melena lira, tsünglanglen agüja

aliba den Identity Card indang mobile photo tejangja ka 'reports.dosenl@gmail.com' dangi email (Plain Text & NOT as attachment) yoktsü atema DoSE Principal Director, Shanavas C, IAS-i sangdong ka nung metetdaksü

1. Sl. No. in the List 2. Name of Teacher 3. Mobile No. (10 digits)

Iba mapa ya Smart Phones/Laptops/PCs ajanga inyaktsü akok anungji tesayurtemi iba mapa inyaktsü atema ki toktsür tangaleni maotsü metetdaksür, ta Shanavas C-isa ashi.

'Mokokchung Cart' ajanga order asütsü akok

Dimapur, March 30 (TYO): COVID19 ajanga state ajunga shibangba mapang Mokokchung District Administration-i online ajanga tongtipang tenüngdabatem order asüba mapa ka tenzütsüogo.

Mokokchung district ketdangsertemi 'Mokokchung Cart' ta ser android app ka sayatsüogo aser iba ajanga nübertemi order asütsü akok aser Delivery Officers-i COVID19 medical inyakyim lateta aliba ama ki tonga bentsür arutsü.

Iba app ya google drive link <https://drive.google.com/file/d/10kqgjsnBCZmrpTp-OiYQ8Fd3c9kDDLQk/view?usp=drivesdk> ajanga download asütsü akok.

Mokokchung Cart app ya tang Google Play store nung review kübok lir aser anogo tenet sülen Google Play store nungi download asütsü akok. Iba app ya Team Trail Hounds-i teyari agüja TA & Co ajanga yanglu.

Mokokchung nung alirtemisa WhatsApp number: 8794162336 / 7005238788 ajanga order sütettsü.

IAF-i medical osettem bentsür aruogo



March 30, 2020 nü Dimapur Airport nung IAF indang C130 J Super Hercules tayimtsü arua anenzükur medical osettem agizükdang agiba noksa angur.

Dimapur, March 30 (TYO): Hombarnü Delhi nungi Covid 19 dak sendakba medical equipment tem Dimapur airport tonga bener aruogo.

Iba ya State Health & Family Welfare department aser NSDMA nungdakba osettem lir.

Tanü tayimtsü ajanga bener aruba osettem rongnung ventilators, Personal Protection Equipment (PPE), Mask, Gloves, Sanitiser dena lir.

Hindon Air base nungi 77 squadron (special Air operations) indang C130 J super

Hercules tayimtsü ka nung tonne 8 shi touzük medical osettem bentsür aru.

Iba tactical airlift aircraft ya special forces tekaratiba nung anir aotsü atema amshir aser runway mashi ka nung anenzüktsü akoker.

Nagaland state indang medical osettem abenba den külemi iba tayimtsü nung Manipur sorkar meyong ton 5 medical osettem bena liasü aser ibaji tongtsütsü atema Dimapur nungi Imphal airport-i apusoa ao.

State sorkar ketdangsertem, Dimapur nung project office (IAF), HQ EAC Shillong, Air Hq (VB), MoD aser DRC, Nagaland house, New Delhi nungertem ajanga tanü IAF indag tayimtsü ajanga medical osettem bener arutetogo.

Iba asoshi Nagaland state sorkari IAF dang pelaba metetdaksüogo.

Taoba mapangtem nunga IAF-i State disaster management relief, civil administration indang missions aser aid maparen nung yaritepogo.

KSCDL-i NHAK nem Smart Ambulance 2 agütsü

Dimapur, March 30 (TYO): Kohima Smart City Development Limited (KSCDL)-i Naga Hospital Authority, Kohima nem rondak COVID-19 maparen inyakdang amshitsü atema Smart Ambulance ana agütsüogo.

Hombarnü KMC/KSCDL Office Complex Kohima nung Urban Development and Municipal Affairs Advisor, Dr. N. Nicky Kire-i MD NHAK, Dr. Thorse nem smart ambulance ana indang sapitem agütsü.

"Iba ya temoatsü ulura lir, kechiyong tang tensa nung iba ama ambulance tajung ya nungdaker, kechiyong smart ambulance nung shirang aser driver atema takdang balala lemasa lir" ta Dr. Nicky Kire-isa ashi.

"Ni Kohima aser temeket nung mozü ki aika sema senzüogo aser idangji COVID 19 anema inyaktsü renema aliba nguogo. Nisungtemia iba wara indang osang meteta lir aser süoki ia bilemer" ta paisa ashi.

"State sorkari nübertem iba wara nungi jenbua alitsü atema akokba tashi mapa inyaker. Onoki mapa tajungtiba inyakdar anungji social media nung state sorkar indang osang tamajung kar prokshiba nung mamangtsü mepishir. Sorkari mapa tajung inyakbatema nisungtemi ajitetsüla" ta Advisor-isa shisem.

Urban Development & DMA Principal Secretary, Himato Zhimomi-ia o jembidang "state sorkari mapa tajungtiba inyaker aser ibaji sorkar atema bilemja inyaker" ta ashi.

"Iba wara anema doctor, nurse aser paramedic temi mapa tajung inyakba atema pelar aser tenüngsang agütsür aser nenok ya shitakba Tsüngrem osang abenertem" ta Himato-isa metetdaksü.

"Kohima Smart City-i sensotem nem Emergency Health Service agütsütsü atema Smart Ambulance ana ya ali. Tanü state nung tensa asadangba sülen UDD

& DMA Advisor Dr. Nicky Kire aser committee-i CoVID-19 wara mapang amshitsü atema Naga Hospital Authority ket nung agütsütsü teletetba agi" ta CEO, KSCDL Kovi Meyase-isa ashi.

MD, NHAK, Dr. Thorse-ia Kohima Smart City dang pelaba metetdaksü.

"Onoki iba ama ambulance kanga nungdaka liasü aser tajungtiba nung amshitsü. Tang tashi nungbo Nagaland nung COVID-19 aketer ka danga puteta mali saka asenok zübazülema malitsüla" ta Dr. Thorse-isa ashi.

Tanü UBC Pastor, Rev. Dr. Rachulie Vihienuo-i Smart Ambulance anaji meshiteta sarasademtsü.

Smart ambulance nung Oxygen Cylinders b type/bulk type, Ventilator, ECG, Suction, Foot Suction, Monitor, Laryngoscope, 5 KVA online UPS, Portable Stretcher, Surgical Disposals, Syringe pump, Defibrillator aser AC Built in lir.

NE nisungtem mezüngmeshiba aitsür: AKM

Mokokchung, March 30 (TYO): India yimti balala nung north east region nisungtem mezüngmeshiba aser bendanga amshiba atalokba angashidang Ao Kaketshir Mungdang (AKM)-i kanga süoki ia bielmtsür aser kukua aitsür, ta AKM tir Sb. Nungdokyanger aser tongti zülur Sb. Nekmi Longkumer nati sangdong ka ajanga metetdaksüogo.

"Iba ama mezüngmeshiba mapa jagi North East-ji India

nung shilem ka lir ta nübertemi angateta maliba tali shisanga sayur", ta AKM-isa metetdaksü.

"North East region nungi India yimitemi oa talisa mozüki balala nung inyaker aika lir aser parnok jagi tang ayimsünga aoba Covid-19 tashitak den rara-a taküm kümzükba nung shilem agidar, ta AKM lenirtemisa ashi."

"North east region nung aliba state-temi tanga state nungi arua yangi alirtem ajak taküm kümzüka ayutsü asoshi akokba

maparen balala inyakdaka, yamaji, tanga state nung alirtemia kasaji north east nübertem denjia anepalua benshidaktsünür", ta parnokisa mepishia ashi.

"Mezüngmeshiba aser bendanga amshiba jagibo taneptsü aser teletetba tajung kecha bener marutsütettsü, anungji, tang mapang ya aseni ajuruba alima wara Covid-19 anema asenok ajak külemi lungjemer raratsü nungdaker", ta parnokisa shisem

Dimapur Naga Students' Union-i sorkar dak temlung masür



Dimapur, Metsüremi/March 30 (TYO): Sorkar ajanga nüburtem lokti nungi pila alitsü totuyuba agüja liaka Hombarnü Dimapur nung nüburtem adenshia aser nungtepa osettsüset balala alitepa ngua Dimapur Naga Students' Union (DNSU) mepelaba lemsatep.

Media Cell DNSU ajanga sangdong ka nung ashiba agi, nisung o nisung tsüngda metre ka alitsü tuyuba yimya mamshie nüburtem sadem-sadema senzüka ngua Union kanga

aoksar, aser ibai nüburtem asü sorkar teblemstü, ta asüngdang.

Principal Secretary and Home Commissioner, Abhijit Sinha dang, ketdangsertem aser lokti tentet balala den shisa lemsateper totuyuba ya agütsür asü odang agütsür, ta DNSU-i asüngdang, kechiaser Dimapur ya tesem tulu aser Nagaland nung nütsüng timtiba adenshia aliba tesem rongnung ka lir, anungji sorkar ketdangsertemi ozüng mapa küma inyaktüsü tasakba kümdaktsür, ta ashi.

Administration aser Kalos Society ajanga Pfutsero nung tzü agütsü

Kohima, Metsüremi/March 30 (TYO): Linük ajanga shibangba ajanga Phek district kübok Pfutsero nung tzü agi anünga alirtem nem Additional Deputy Commissioner kübok Kasa mapang Kalos Society administration, Kalos Society aser colony nung volunteer temi tanü tzü agütsü.

Kalos Society director Kupelhi Losou-i ashiba agi, linük shibangba matem tashi iba jila nung nüburtem nem tzü agütsüsü.

Kasa mapang Kalos Society ajanga nübutem dang tang ama tensa nung maneni sarasademstü, maneni yariteptsü,

Village/Colony councils aser Youth organization temi anepalua volunteer temi bendanga agütsür administration, police aser medical department den yarisema state shibangba mapa nung mezüng sür nokdaka aser nüburtem oli-oraba kanga junga meita liasü, saka sorkari lokti tentet dang state shibangba nung shilem magitsü tenokdangba agütsüba sülen tanüsa (Hombarnü) iba süngjang nguogo, ta DNSU ajanga ashi.

Sorari COVID-19 tendangba aser anepaluba angadi asütsü ta sangdongba aser mera balala agiba atema pelar, saka iba tashidak wara ya state tesem ajungaleni meprokshi tsüngda mapa tali inyaktüsü ajungshir, ta Dimapur Naga Students' Union ajanga ashi.

Maneni DNSU-isa sorkar dang, tezüluba kija nung masü saka sorkari anir mapa agia inyaka tajangzük tali angutsü mechi ketdangser aser lokti tentet balala den ano senden amentsüla, ta ajungshi.

Maneni Dimapur Municipal Council (DMC) ajanga shishilembaba tesemtem anogo nung khenbosa sanitise asütsü mepishir aser nüburtem akok tashi kilung nung alitsü aser COVID-19 tashidak wara ya süoki ia agitsü ajungshir, ta DNSU ajangasa ashi.

maneni tenzüktüsü aser kati ka meimtsü ajungshi.

Nüburtem atema aser nüburtem nem teyari agütsüsü mechi senotsü teyari agütsüba atema Planning & Coordination, Land Revenue aser Parliamentary Affairs Minister, Neiba Kronu dang pelaba parnokisa lemsatep.

MARCOFED ajanga CM Relief Fund nem tenla agütsü

Dimapur, Metsüremi/March 30 (TYO): Tang COVID-19 Minister, Neiphiu Rio-i pei sasa ayongzükba nung ajemdaker MARCOFED nung inyaktertemi

Chairman nungi temelaba agir Chief Minister Relief Fund nem March 30, 2020 nü NSCB Cheque No. 203937 ajanga tenla sen lakh ana agütsüogo, ta Managing Director sangdong ka ajanga metetdaksü.

GPRN-i asür Joseph C Wangsa mangyimer

Dimapur, Metsüremi/March 30 (TYO): Ajungbena aser mapang masüdag Konyak Region kübok Mon yimtsüng nungi Security Task Force (STF) Battalion, Naga Army züngsem (L) Sergeant (Posthumous) Joseph C Wangsa (s/o S Chingyem Konyak), Naga Army No. 45244/19 asüba aoshi Government of the Peoples' Republic of Nagalim (GPRN) mangyimer, ta MIP, NSCN/GPRN sangdong ka ajanga metetdaksü. Pa ya Naga linük tenzüktüsü asoshi November 15, 2019 nung tenüng zülüok.

tatsüka tenzüka mapang anakshitsü makokba linük meimba tanüla bener masü tashi nokdak, aser iba atema pa tenüng ya Naga nung puti otsü nung zülüoktsü aser pai Naga nung asoshi bendanga agütsüba ajak mulung nung alitsü. Pa asüba ajanga tawa adokdaksüba kanga jangja meteter aser iba tawa nembangtsü tasak asütsü.

Mangyimer kibong den GPRN-i asüku lemsateper aser Tulusang Tsüngremi pa tanüla tatem maka tesunep nung anisüngzükdang ta sarasademstü, ta sangdong ajangasa ashi.



Youth Association Aongza Ward-i civil hospital (IMDH) Mokokchung nung inyaker doctor-tem aser staff nem shirangertem anepaludang tashitak memenatsü atema sobuba PPE kar tenla agütsüdag tangokba noksa nung angur. Youth Association Aongza Ward-i iba ama mapang ka nung kanga dang nungdakba osettem tenla agütsüba asoshi IMDH ketdangsertemi pelaba metetdaksü. Iba den ano Young Women Christian Association (YWCA)-i mapang ajak nung yariba den face mask tenlaba, FAC & MTBA na senteper hand sanitizer agütsüba aser shirnokisa IMDH asoshi mapa tajung balala inyakdar, ajak dang parnokisa pelaba lemsatep. Mokokchung, March 29, 2020

DIMAPUR DISTRICT KÜPOK TONGTIPANG TELEPHONE NUMBER KAR YAMAI :

DISTRICT ADMINISTRATION:

- DC Control room: 03862-248530/6009924366(whatsapp)
- Essential Commodities enquiries: 8794442024
- Price hike (complaints) : 8974796425
- Food Bank (if anyone wishes to donate to the needy) : 9366993773
- Dimapur District Community Kitchen fir homeless, stranded & needy: 7005968695
- Facebook account: Deputy Commissioner Dimapur
- Twitter account: @DC_Dimapur
- Email: dcdimapur@gmail.com
- Instagram : DC_Dimapur
- Website : dimapur@nic.in(information to citizen will be in public Notice Officer)
- District Disaster Management Authority Dimapur: 7085288949 (Nodal Officer)
- If anyone wishes to donate financially, may do so in this account:
Account name : Dimapur Covid-19 relief
Account no : 39241187371 (SBI Main Branch)
IFSC : SBIN0000072

MEDICAL:

- For Guidance and Screening: 7005415243/9856071745/7005539653
- E-mail: nlsu.ldsp@nic.in
- Dimapur District medical helpline:
i. Dr Imtiwapang Aier (DSO) : 9612288073
ii. Dr Kainyu (Epidemiologist) : 9612484361
iii. Dimapur District hospital control room : 7630877991/
7630877983
iv. State COVID-19 Helpline: 7005415243 / 9856071745/ 7005539653
- COVID-19 Dimapur Hospital contact no: 6009377390
- COVID-19 (Dimapur) ambulance helpline: 8787551751

POLICE:

- Commissioner of Police: 03862-225519/225456(fax) /7085055001
- Deputy Commissioner of Police Zone-I : 7085055002
- Deputy Commissioner of Police Zone-II : 7085055003
- Deputy Commissioner of Police (Traffic) : 7085055004
- Police Control Room: 7085055050/03862-228400

GOVERNMENT OF NAGALAND DIRECTORATE OF HEALTH AND FAMILY WELFARE NAGALAND : KOHIMA

NO. H&FW-27/B-30/NCOV2020(PT)/950-56

DATED KOHIMA, THE 30TH MARCH, 2020

METETDAKTSÜR

Reliance Industries Ltd ajanga nüburtem khuret ajiteta Emergency Service garitem nem tsünglanglen agüla aliba atema Totzü Angadi agütsüsü (copy of email received enclosed) :

- COVID-19 agi shirangertem anir shimteta aliba quarantine aser shimteta aliba COVID-19 Hospital mesüra Isolation tesemtemi oli aruli asüba atema.
- Shimteta aliba quarantine mesüra isolation tesem nung amongtsü ajungshirtem anir aoba atema.
2. Angadi totzü ya Reliance Retail Outlet ajanga dang emergency service gari driver/crew nem authorisation letter (Sample Copy tsünglanglen agüja lir) tsünglanglen agüja aliba Sorkar ketdangseri agütsüba bena alir nem dang agütsüsü:
a. District ka nung Deputy Commissioner ajanga jangjatsüba District Administration Officer.
b. District indang Chief Medical Officer.
c. District indang Superintendent of Police ajanga jangjatsüba District Police Administration.

NB:

- Temelaba agütsüba shiti ya khen atema dang asütsü aser Reliance Retail Outlets nung yutsütsüla.
- Authorized Government Authorities ajanga temelaba shiti ya duplicate nung agütsütsüla (original ji Reliance Retail Outlet atema aserduplicate copy ji office record atema).
- Anogo ka nung gari ka atema totzü timtiba agi litre 50 (Fifty) dang mesüra litre 50 (Fifty) tashinung quantity mashi ka.
- Angadi Totzü agütsüba ya 30th March 2020 nungi 14th April 2020 tashi alitsü.

Sample Copy of Authorization letter:

- Name of patient(s)
- Individual earmarked for designated quarantine and dedicated COVID-19 Hospital Or Isolation facilities on board
- Registration Number of the vehicle.

(MENUKHOL JOHN)

Principal Secretary to the Government of Nagaland

Assam sorkari masks lakh 4.7 lema agütsür



Sarusajai Sports Complex nung COVID-19 agi shirangertem atema quarantine center yangluba noksa nung angur. (Guwahati, March 30)

Guwahati, March 30 (Agencies): Assam sorkari Hombarnü COVID 19 screen asürtem nem surgical masks lakh 4.7 lema agütsüogo. "Supply maparen tajungba akümba agi onoki teimba agütsüteter" ta Health

Minister Himanta Biswa Sarma-i ashi. Lohia Group of Companies nung Chairman, Kailash Lohia-ia tanü Covid 19 anema inyakba nung amshitsü atema Health Minister nem Rs 25 lakh agütsü. Iba mapang MoS

Health Pijush Hazarika liasü. "Guwahati-i COVID 19 anema raratsü akoktsü atema renema lir" ta Himanta-i ashi. Sarusojai Sports Complex nung nisung 700 shi asemtsüsa quarantine center ka yangludat, ta paisa shisem.

Assam nung doctor ka malaria mozü achiba sülen asü

Guwahati, March 30 (Agencies): Guwahati nung aliba Pratiksha Hospital nung doctor Utpaljit Barman asübaji hydroxychloroquine achiba den sendaktepa alitsü akok ta osang ajanga ashi.

medemertemi ashi. "Doctor aikati Covid-19 nungi jenbutsu atema hydroxychloroquine achir, Barman-ia ibaji achi" ta Pratiksha Hospital nung medical superintendent, Nirmal Kumar Hazarika-i ashi.

19 agi atongtsüpurtemi achi junger ta agizüka lir.

Arishi küm 44 tain Barman ya senior anaesthetist ka liasü aser pai anti-malaria mozü achiba sülen temulungjang mapa meinyaki kümer asü. Malaria agi shirangdang hydroxychloroquine mozü achir aser iba mozü ya Covid-19 shiranger nema agütsür.

Barman dak temang nung tashidak kecha balaka maliasü aser doctor temia pa hydroxychloroquine achiba ajanga asüba kuli magütsüteter. "Pai mozüji kwi ka achi'ar onoki memetet. Ana achi asütsü akok" ta Hazarika-i ashi.

Assam nung tang tashi Covid-19 aketer ka dang puteta mali aser sorkar laboratory aser mozü kitemi tendangtsü aser anepalutsü temelaba agüja lir. Ajisüaka, nija mozü kitem nung doctor aikati Covid-19 memenatsü atema hydroxychloroquine achiba osangtem angazüker.

Barman temulungjang nung timtem kar adoka Deobarnü nija mozü ki ka nung anepalutsü aniok aser idakji pa asü, ta par

Indian Council of Medical Research (ICMR)-i malaria agi shirangdang achiba hydroxychloroquine ya Covid-

N i s u n g t e m i hydroxychloroquine raktepa alitepa osang angashiba sülen sorkari iba mozü mashii machitsü atema tetuyuba agütsüogo. Iba mozü ajanga temulungjang aser tezüngjang majungertem nem timtem bentsür arur.

Hajo nung lanur ka dak COVID-19 lir ta temulung malemer

Guwahati, March 30 (Agencies): Assam kübok Hajo nung lanur ka dak coronavirus keta lir ama ajitetba agi pa Gauhati Medical College and Hospital (GMCH) nung anepalutsü atema anir ogo.

alir asangur ya tawa tu Maharashtra nungi aruba liasü. Pa ya Maharashtra nung nisung pungu den külemi ali aser parnok ajak dak COVID-19 puteta lir.

jangjatsü, ta doctor temi ashi. Pa GMCH-i anir aoba sülen Hajo nung alirtem kanga petsaprongtep.

Hajo kübok Dampur nung

Lanur ka COVID-19 aliba yimya ajitetter saka final test osang anguba sülen ang ibaji

Lanur indang sample tendangba nung COVID-19 keta aliba putetra, ibaji Assam nung mezüngbuba putetba asütsü.

Arunachal MLA-i COVID-19 agi shirangertem yaritsü

Itanagar, March 30 (Agencies): Arunachal Pradesh MLA, Nyamar Karbak-i par assembly constituency nung COVID-19 agi shirangertem anepaluba sen endokba ajak otsütsü ta metetdaksüogo. Iba nung isolation aser quarantine asürtem dena lir.

angutsü ta asüba nung ajemdaker nisungtem mashimashi mesenzütsüla. Nüngdakba mapang ni ozü nübortem yaritsü saka parnoki health department tetuyubatem sülen anidaksüla" ta Karbak-isa metetdaksü.

Karbak ya West Siang district kübok 27th Liromoba assembly constituency nungi MLA lir aser pai ashiba agi "public tenüing nung shimtetba nübo ka ama iba tensa nung ni akokba tashi ozü nübortem yaritsü."

Karbak-isa Kamba, Yomcha, Liromoba aser Darak primary health center shia nem sen lakh anana agütsü aser ibaji personal protection equipment (PPEs) alitsü atema lir.

"Arunachal Pradesh nung COVID-19 aketer ka dang puteta mali saka nisung kar isolation nung aser kar home quarantine süa lir. Iba atema senotsü nüngdaker" ta paisa ashi.

Pai West Siang district medical officer Dr Moli Riba nem Rs 50,000 talila agütsüsem aser ibaji police nem PPES alitsütsü atema liasü.

"Ajisüaka, senotsü teyari

Aalo East MLA Kento Jini-ia clinical masks, sanitizers, gloves amala alitsü atema Rs 1.5 lakh aser police personnel o medical ketdangsertem asoshi PPEs alitsü atema Rs 1 lakh agütsü.

Agatha Sangma-i Rs 1 crore tenlar

Shillong, March 30 (Agencies): Meghalaya kübok Tura MP Agatha Sangma-i la indang MP Local Area Development Scheme (MPLADS) nungi sen crore 1 COVID19 anema inyakba mapa atema tenlatsü.

lemzüktsüba nungi asütsü" ta Meghalaya Chief Minister indang office-i metetdaksü.

"Meghalaya MP Agatha Sangma-i la indang MPLADS nungi sen crore 1 tenlatsü nanzükogo. Iba ya Ministry of Statistics and Programme Implementation (MoSPI)-i financial year 2020-21 atema

Linük ajunga anogo 21 shibangba mapang nisung ajaki Chief Minister's Relief Fund (CMRF) nem mulungsoa tenlaang ta Meghalaya chief minister Conrad K Sangma-i ayongzüka liasü.

Tripura nung COVID19 taila osang prokshir ka apu



Agartala, March 30 (Agencies): Tripura nung COVID19 indang olulu ka Facebook nung prokshiba atema police-i lanur ka puogo.

"Asenoki ajaki COVID2019 anema longjemer noktakdi aser anogo 21 shibangdang kati ka yaritepdi" ta Conrad-i ashi.

Iba nisungji Abhishek Dhar tya jangjaogo aser pa ya Badharghat nung alir.

dang Facebook post indang osang metetdaksü aser bushisügang asütsü asügangdang.

Deobarnü Arundhuti Nagar police station nungi police-i Abhishek Dhar par kidang apu. Abhishek Dhar-i Deobarnü pa indang Facebook account nung par kiyong nung Coronavirus (COVID19) agi shiranger ka lir aser iba nisung jagi miimshir ta sangoktsü.

Arundhati Nagar police station nungi police-i mapang meindoki Abhishek Dhar'er kidangi orr pa dang COVID19 agi shirangsang maitsü asügangdang.

Iba Facebook post ji kanga prokshi aser nisungtem aoksateta petsaprongdaksü. Kiyong nung alirtemi police

Iba sülen police-i Abhishek Dhar pur police station-i anir ao aser jungjunga asaügangdangya asügangdang pai taila osang yanglua prokshiba nangzük, ta parnokisa metetdaksü.



Hombarnü Chief Minister Sarbananda Sonowal-i Goalpara district kübok Bongaigaon-i aodang Agia nung asha workers den ajurutepa sensaksemba angur. (Goalpara, March 30)



TIR YIMYIM YIMOBILEM (EDITORIAL)

DIMAPUR SANGTENNÜ, METSÜREMI (MARCH) 31, 2020

Yamai kopiga otettsü?

Kidang chiyongtsübo maka saka tashidak menatsü tsübuba agi mapa kecha meinyaki kidang amongtsüba ya anisüngzükba mapang ka masü saka shisabolutsüba mapang ka lir. Atangji, menatempa aoba tashidak wara tulu agi alima ajak ayimsünga aoer asünungji, ibaji nokdangtsü atema yimteni nisung shinga kimaia maludaktsüi ozüng agi nokdanga lir, anungji koda masüba shilumanem, asüama aser jangotsü alitsü nungdak ka mesüra shinga kimalen kisemtsüsemi aotsüa majungshir aser lokti adenshitsuäa memelar. Ibayongji, asenok arogo nungertema tenla kidang amongnü dena külemi telongjem sentep sentong magitetter. Iba amaisa , corona tashidak wara ya mesüitem tashi asenok arogotem nung tenla ki lapoka tamanger telongjem sentep magi ata nunga koma süla (?) ta taoba hopta nung asenoki bilemdangogo. Atangji, arogo aika nung government-i ashiba angaa March 22 amongnü temoatsü sentep sentong nungi tenzüka aonung aser anüngdang tenla kidang sentep sentong kecha melii pei pei kidang dang tekülem sentep sentong yanglua agitsü ajungshia arudagi. Iba denji ano sannükertemi cable tv aser youtube ajanga Tsüngrem o jembiba yokdagi. Atangji, Tsüngremji nisung teka agi yangluba tenla kidang dang masü saka ajak nung lir, anungji tenla kidang külemisa masüyonga asenok kidang aser mapa inyadkak asenoki Tsüngrem külema Pa den jembitsu akok. Ano, talisa Laishibai ashiba Tsüngrem tenla kibo asenok mulungjang ya dang lir, anungji asen molungjang nung bilembatem Tsüngrem tsüngdang tagizüktettsüsa asenok lira, shitakba tenla kidang tenlabajibo aji asütsü. Ajsüaka, alemli tenyartem putu nung arogo tenzüka longjembajia Tsüngremi Pa dak amangba purtem külemi longjemer Pa temeim aser sentsüwangshi mapatem inyadkaktsütsü asoshi longjemdaksüba lir, anungji Khristan taküm ka asoshi külem amangba purtem telongjem arogo tenteta külemi külemtsü aser külemi telongjem ka ser Tsüngrem mapa inyaksüba kanga tongtibang lir. Aji oda, tang amaisa mapang talangka sentep külemi melitettsüsa aküm nungbo arogo telongjem tashmait aotsü aser tatsüka orrbo arogo nunger aika arogo nunger masü amai kümadoktsü. Atangji, iba ama tasütsü wara tsübuba mapang kibong aika Tsüngrem anasai tali aoer aser tamang nung tashi itshir saka ano sarasadem mapang anitsüsa lenir kata maliba kibonga aika lir. Item asohiji sarasadema sentong kar bilemdangtsü nungdaker. Joko, asenok arogo karbo külem temoatsü sentep ana tashi magii arur asünungji, tenla sena mesarur aser ita amar, anungji toklang tenzükertem nem ita sen agütsütsüa tebilemstü adoktsüa akok. Atangji, tasütsü tashidak nungi kümzüktsü asoshi yimteni dena lokti senden aser sentep sentong malitsü shiaka arogo karbo tamang agi akhi ama sentep sentong agia aoba angur. Tanüla mapa yabo nisung nü agi anguba aser nisungi bilemba ama masü, tamang mapa, anungji ibaji shitak tai ta ashitsüba tasak. Yisu taküm alidang dang masü saka asen lima nunga nüpkoker aser shiranger jungtsüba aser temenen tanüla aridoktsüba tang taküm alirtemi ajangshio. Itemji tamang mapatem lir. Ajsüaka, iba tashiji tamang agi mapa küma inyaksüsa melira, tzüwa mashi ser Peteri tzü nung pongok amai asütsü. Ano külen bilemdangtsüba kaji, tashidak mena tsübuba agi külemi ajurutepea menungteptsü aser tangshitepa mamentsü atema tenla kibo shibanga ayu saka jangotsü ayokdakbo mongdang amai adenshia nungteper ta asüba ya kopiga aotsü (?) ta temulung animesüngzükteni bilemer. Yamai talangka aotsü asü nungbo jangotsü ayokba dokana akhi ama anepdang nungi nikongdang tashi lapoka ayutsüla , tenla kidang tashidak memenatsüsa senteptsü melatsüla aser telok tilalabo alu mapai aotsü melatsüla. Iba amaisa ao nungbo, tashidak wara sülen yawara arutsü, ashir auer tali poktettsü aser tamanger agi mamanger küma aotsü. Ashiko, akhidang asentenshi adokba mapang pei tamang yari arogo lemsaba ama lemsatsüsa ataloktsüa akok. Item shisabolu khuretji bena asenok ajak asoshi kanga sarasademtsüba tang mapangba ya lir.

OLEMSABANG

TENETBUBA TEMAITSÜ AJENBA ASER LIANGMESEN ARONGBA SÜ

- Süpongünsang Longkümer, Darogapathar Dimapur

Ocet azünger ajak dang tamasa Yisu temeim salem. Küm tenet rishikangshiji tang ataloker ta mashir saka kodang südir süaka kümtanga alitsü aser angateta alitsü lemsatepber. Tenetpuba temaitsü ajenba lapokbaji Yisu JA 5: 5 Kaketlong aser iba temaitsü tenetji Pai lapoktsü akok."JA 8:3 Aser hon agi yangluba liangmesen arongba su ampa kotak tenyar tangar ka aru, aser chuba menden madang aliba hon tekülemdak manung temeshipur ajak sarasatem meyoktepdaktsütsü pa nem liangmesen jendi agütsü. kotak tenyar tangar ta asüba ya shidakba kotak tenyar masü mojing. (Tanü atalokba Corona wara ya tesüngmangtsü tamatari, aser makmakshishi lendong, yimsüsüri ozüng agütsüba angatsü asü Tsüngrem o, Laishibai ashiba angatsü ta tetsüngta nung meimchir ajak kangshitepber. Lipok 15: 18 nung, Iba anogo nungji Kibubai Abram den tezüngzüktepba ka yanglua ashi, "Nü semchir nem ni iba li; Ijip ayong nungi Eufrates ayong tulu tashi agütsür" Eufrates ayong ya Pezüpuba ayong. Lipok 2:14, Pezü ya Nisung number asünung ibai subaliba mongjen liasü, aser Israel artsü ka liasü taq Nisung kari ashiba agi Eufрата ayong metaji mojing mongjen ta, aser arasentsür mapa adokdak tesem ta kuli agütsür. (JA ratet züluri zülua aliba ama saka tongmelang agi zülu mesüra anogo aika adoktsütsüsa akümstü) 8:6 Kotak tenyar tenet jagi jangzü aputsü asoshi bei sasa renem. Aser Tenyar tenet jagi jangzü apu shia mojing adok aser temerenshi atalok. Tapu 8 nungi 9: t1 Bonglang makaba süngkümrütsü (Sabi) mojing nem agütsü. Lik21: 23 Kechaser alima nung timtem tulu nüpurtem madak ataloktsü Tsüngrem terasaba tulu alitsü. JA 1: 18 Süngkümrütsüji Yisu ket nung liasü. Idak nungi tapu 9 ajak züngra angajemtsü t 14 Jangzü amer aliba tenyar terokpuba dangji ashi, "Shibanga aliba kotak tenyar pezüji Eufrates ayong tulu nungji ckiokang. (Kotak tenyarpo alenera mayur aser shibangera mayur anungji parnok ya kotak nungi Lucifer ajemzuka yokdang kotak Tenyartem anisemer tsüker petinutem (Mojing)ta ashir. Parnoki alima nung timtem perokdang Tsüngremi temaitsü ajena maliba, itempurtemji tang kangshitsü asoshi parnok dang mela. (Tsüngremi mojing nem süngkümrütsü agüjaka Tsüngremi temaitsü ajenbapur dak tashidak wara agi mekongshitet.) Efesa 1:13,14 tanüla temeshi agi ajen aser senmang agütsü ta lai jagi sayur.) Ibai Tsüngrem o lir, Pai tejak merpranger. JA 9:20,21 Temerenshi agi tanüngbatem metepset saka parnoki temulung meyiptsü melena süngyanglu külema japujaria arasenba mapa inyaka auyatsü atema temulung memeyip. 1 korint 10:14-21. Khrista külema kibuba benjung achitsü, aser limapur benjung nung sarasatemja adentsü. Sorkar sen, aser arogo sen nung ochi mashi katsümentsüba item ajak dena lir. JA ratet tapak 104, 105 nung angutsü. Ibai Tsüngrem o nungi lir. Temenen nangzükra adoktsü saka tai madokbaji temulung memeyipba Rom 1:18,2:5 Isaia 24:5,6. Nung angutsü. Timtem tulu küm tenet rishikangshi mapangji 2 Tesa 2: 2-4 t ajak züngangma. Tashi mangasang tamasa arutsü aser ozüng mangasang jongkai adoktsü paji tesamatsüba chir lir. Tsüngrem tenüng nung ajar aser külemer pai Kümzüker. Küm tenet rishikangshi tenzük nung timtem tanen makatsü ajak nungji tekülem kidangi tekülemi mao, market ajak shibang nung taküm alitsü jungtima ta bilemer. Israel nungera Eyp nungeri tekülemi modaktsüba agi kangshi aser südaktsü.

Naga lima ya khrista meyong ta sangoktsü nung Tsüngrem memetetba kintemi repranga alitang wara tamajung agi mekongshira aji tamang sayuba asütsü; saka kongshira tataladaktsür asütsü. Takar limatem nung tentangtettsü oset liaka tamajungba tang atalokba angashir anungji ajak dang tashi tulutibaji tamang sarasatem, sarasatem agi akoker. Iba ama densa nung tamataridaktsütsü, makmakshishidaktsütsü social media- smart phone, facebook, whatsapp amala ajanga shiri olulu peroker parnokjia mojing tenyar pezü tashidak peroker rongnungji adentsü, olulu agi alima südaktsür. Shidak angateta amangra Tsüngremi kümzüktsüsa, Tsüngremi mojang.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Myanmar nung Arakan Army temi apuba pastor chiokogo



Burma nung Khristantem sarasademba yangi noksa ka angur.

March 30, 2020: Yaküm January ita Myanmar nung Rakhine State kübok sorkar anema nokdaker army telok kati apuba pastor chiokogo, ta US nung aliba persecution watchdog kati metetdaksü.

Believers Church Myanmar nung Pastor, U Tun Nu ji Arakan Army temi apuba sülen ita 14 lir tan ita tentenzüklen chiokogo; telungpurtem jagi yimdak yimsüsürtem ket nung pa agütsüogo, ta International Christian Concern osang ajanga metetdaksü.

Tamalen Christian group Gospel for Asia-ibo, pastor u Tun ji süogo ta osang proka liasü, saka pa chioker tangbo pa kinüngtsü aser jala tanutsüla den külemi lir.

Pa chiokba sülen pai ICC den jembidang pai, "Ita 14 ji kü taküm nung tanela, shi aser shisatsü tsütsü mapang tamajung ka liasü. Khenkhenbo ni Tsüngrem dang, joko ni metizükteter ta sarasadem aser Tsüngrem dang ni bendanga agiang ta sarasadema liasü," ta metetdaksü.

Arakan Army nungji Rakhine nung aliba Buddhist

nungera aika lir aser parnoki Rakhine State atema akhangar.

Arakan army temi pa dang pa tamangba yimsü indang asüngdang aser pa atala-a liasü, ta shia pastor-i ashiba agi, "Na arur kümzükang ta nü Tsüngrem dang mepishiang ta parnoki kü dang ashi."

Anogo shia pa nem chi tesa den tzü litre kaka dang agüja liasü.

Mapang ka nungbo nisung kati memeteti pa dak injang khaloktsü saka külaklaksü kübok pa tola dang ateta akah saka pabo kecha meyrui liasü.

Tamalen Burma ta ajaba Myanmar linük nung Khristantem kanga reshikangshir aser linük nung, talisa China, Thailand aser India arrtsülen kin o kin na tsüngda rara kanga adoker.

Open Doors-i ashiba agi, alima nung Khristantem tamajungtiba reshikangshiba linük 50 (2020 World Watch List) rongnung Myanmar jenjang 19buba nung lir.

Open Doors-i ashiba agi, iba linük nung rara ajanga Khristan lakh 1 dak temai pei ki toktsür camps nung jenoka alir.

Tan ita tetenzükeln Myanmar army airstrikes nung asürtem timbaka Christian ethnic Chin group nungi liasü, ibayongji Arogo lenirtemi iba linük nung Khristantem anema kanga inyaker, ta bilemer.

Paletwa Township, Chin State nung army temi Meiksa Wa yim amakdang civilian 12 asü, aser tasüngnüa Wetma yimdak nisung ti asü aser Pyaing Tain yim nunga nisung ka asü.

Yaküm Texas pastor Bob Roberts-i, tesüiba 18 tsüngda Myanmar nung mitkartemi Khristan nütsüng timba aliba Kachin province nung Tenla ki 60 poksatsüogo, ta metetdaksü liasü.

Yaküm July ita nunga U.S. State Department Ministerial to Advance Religious Freedom senden nung jembidang Myanmar nungi Khristan pastor kati pa küm ka shi pua ayuba mapang nung pa reshikangshiba indang lemsatepa liasü.

Kachin Province nung Tenla kitem poksatsüba dak sendakba osang bendenba mapang nung osangbenertem yari, ta tai tonglokja 2016 küm Pastor Langjaw Gam Seng pua liasü. Pa tepoukdak aliba mapang nung pa teka tesülen nungi alena ayu aser chiyungtsü peria magütsüba ajanga mapang shia süchia oa liasü.

Pastor Langjaw-i, "Ita ka dak tema ni pua ayu, teka alena ayu aser tenük shibangja liasü, anungji ita ka piyong ni kecha mangu. Parnoki ni ongken ka nung ita ka piyong ayu aser chiyungtsü tera dang agütsü. Hopta aika ni mapang shia süchia ao," ta lemsatepa liasü.

Nepal nung Police-i Pastor ka apu

Hyderabad, March 30, 2020 (Agencies): Tan hopta Nepal nung police-i, Khristan pastor kati coronavirus (COVID-19) tashidak indang osang tai proka "Khristan sarasadem ajanga iba tashidak aneper" ta jembir, ta aija apu.

Arishi küm 32, Pastor Keshab Acharya ji Pokhara, Gandaki Pradesh Province nung aliba par kidang lia Hombarnü (March 23, 2020) police-i apu. Par Arogo nung sayutsüngiba mapang nung pai coronavirus tashidak aitsüba indang video ka social media nung prokba sülen pa apu, ta pastor kinüngtsü, Junu Acharya-i metetdaksü.

Aonung 8:00 ako nung nisung kati phone ajanga la kinüngtsü atema sarasademjang ta Pastor Acharya dang mepishia liasü, ta Junu-i metetdaksü.

"Nisungba jagi sarasademdaksütsü atema ozü kidangi arunüa liasü, aser kü kinüngbuia melunga liasü," ta laisa ashi.

"Parnok ataba mapang nung tetsür police ka densema police pezü ozü kidangi aru. Kima nungi parnoki onok dang parnok-a Khristan aser

sarasadem nungdaker ta ashi. Ajisüaka parnok ki telungi aitba sülenbo pastor longbang aser pa aputsü ta ashi," ta laisa metetdaksü.

Novel coronavirus indang osang tai prokba video social media nung lemsatepaba ajanga pa apur, ta police-i ashi.

Nepal police website nung shia aliba agi, Pastor Acharya-i novel coronavirus indang osang tai prokba aibelen atema pa apu.

Police-isa video ka saya aser iba video nungji Pastor Acharya-i coronavirus ya temenen tanela, ta shia Yisu Khrista tenüng nung arrtsür.

2015 küm nungi sayutsüngitsü atema Pastor Acharya-i YouTube amshir, ta laisa ashi.

"YouTube nung telangzüba tamajung aika onoki angur. Mapang kaka nungbo Australia, Europe aser US nung aliba Nepali oshi jembir Hindu nungertemi onok dangi call süa o tamajung ashir. Onok tepsettsü ta parnoki amokmerener," ta pastor kinüngtsüisa metetdaksü.

Nepal Christian Society nung Executive Secretary, Pastor Mukunda Sharma-i District Superintendent of

Police, Dan Bahadur Karki dang ochi obendang agütsütsüla aser pastor anema ken o mebenoktsüla, ta mepishiogo.

"Ni Kargi dang, tamangba yimsü ka beshiba atema police-i pastor anema ken o akatsü makok, kechiyong ibaji meimchir temeden anema lir ta ashi. Ajioda pai (Police ketdangser) kü dang pastor ji asüngdangyatsü atema anir aoba dang ta shiogo," ta Sharma-i metetdaksü.

Pai ashiba agi, coronavirus anema Mongolbar (March 31) tashi Nepal linük shibanga aliba agi pai pastor mesemdangtet.

Pokhara-i oa pastor semdangtsü atema pai ketdangsertem dang temelaba meshidar.

India aser China na tsüngda aliba Nepal linük nung nütsüng shilem 75 bo Hindu nung lir aser nütsüng shilem 16 Buddhist nung lir.

Nepal linük nung Khristan nütsüng shilem 3 dang lir aser Muslim nung nütsüng shilem 4.4 lir.

Open Doors' 2020 World Watch List (Khristantem tamajungtiba reshikangshiba linüktem tarensen) nung Nepal linük ya jenjang 32buba nung lir.

ANOGO ABEN TSÜNGREM DEN

MEJANGJABA TANELATEM

"Temeimbatem, nenoki tanela ajak dak tamang, saka tanelatem Tsüngrem nungi asü masü parnok tendangang; kechiaser tiyazü ainkar jenti alima nung adokogo" (1 Yn. 4:1).

Asentenshiba mapang arogo otsü nung memetetba mi jenti ajangshia aruogo. Mezüng tenyartemi iba mi asoshi tekümdangtsü shia aru. Kümdanga alitsü ashiba tetezü renema alitsü ashiba lir. Iba kuli nung ajemdaker parnoki sayutsüngi masüba tangar Yisu, tangar osangtajung aser tangar tanela Tsüngrem anema sayutsüngiba anema tekümdangtsü ashi (2 Kor. 11:4).

Tsüngrem tenzükertem dang nungi tiyazü tenzükter aser tiyazü tesayur timba liasü. Iba indang aika nung amshiba angur. 1 Yn. 2:18; 4:1; Mt. 7:15, 22, 25:5; 2 Kor. 2:17; Fil. 3:18. Au, tsükchirtemji tzümetsüng ama arur (Isa. 59:19). Tiyazü tenzükba mapa melen Yisui, "tsünglu" "tzümetsüng" aser "mopung" ta jembir (Mt. 7:15, 25). Pauli tiyazü tesayuba mopung agi minzütsü ta jembir (Ef. 4:14). Tanelatemi Tasen Lai arogo nung mashi tenzükter kar ajanga tenzüktsü akok (Ef. 4:11). 2 Korint 11:13 nung asenoki tiyazü tenyartem indang azünger. Tiyazü ainkartem (Mt. 7:15), tiyazü sayutsüngirtem (Gal. 1:6-8), tiyazü sannükertem (Yn. 10:12) aser tiyazü tesayurtem (2 Peter 2:1). Tatem anogo tonga arudang, tiyazü tanelatemi mapa tali inyaktsü. Iba indang Tanela Temeshi ajanga shin (1 Tim. 4:1). Mekümdangba tamangertem tamang nung pilatsü. Ibai ajungben pilaba masü saka mera ka sülen mera ka apunger aotsü.

Tenyartem ajaki tanela balala agi inyakba sayutsüngirtem anema kümdangdaksür. Item indang Pauli amshiba otemji repringang. Tekülak inyakertem (2 Kor. 11:13), timtemdaksür (Gal. 1:7), tiyazü adianutem (Gal. 2:4), mashileni odaktsür (Gal. 3:1), azütem, tamajung inyakertem (Fil. 3:2), kangki tsükchirtem (Fil. 3:18), tekelokdaksür, amajok mapa (Kol. 2:4,8), mezümekümer (Kol. 2:8), anemsü (2 Tim. 2:16), asüküm nisung (2 Tim. 6:4), teraksa (2 Tim. 6:5), mojing sang nung apurtem (2 Tim. 2:26), temeyipoktsürtem (2 Tim. 3:13), amajok O jembirtem (Tit. 1:10), tim masüba sayurtem (Tit. 1:11), telemsateper (Tit. 3:10).

Tanü tesayuba balala aika Arogo nung adoker. Tanü Arogo, Khrista Temang asoshi tongtipangtiba sempetji, "Tangatetba Tanela" nungdaker. Item indang asenoki anogo pezü pungu ka repringangtsü.

Sempet tajung aika agütsüsang Kotak Obala, tanela tajung, tamajung angatetsü sempet kü nem kua. Amen.



Diphupar Ao Baptist Arogo purtemi nungdakba purtem nem teyari agütsütsü asoshi jangotsü bendena ayuba noksa nung angur. (Dimapur, March 30, 2020).

OLONG PAITEP # 5412

	1				2			3		4
5								6		
7			8							
								9		
		10								
11										12
						13				
						14				
15										
						16				

TIPILEN

1. Balaka
6. Aika shirangba
7. Tar tatsü
9. Nenü'er jabaso
10. Sen latettsüba
11. Tangar kübok alir
14. Lon nung inokba
15. Tzü ayimdak
16. Ajok

LANGTSÜNGLEN

- (5) 2. Hai sür inyak
- (4) 3. Aor tenüng ka
- (6) 4. Ali telungi talangka lur
- (5) 5. Tebang kenयोगi mazüoker
- (4) 8. Ken atema anenzükertem
- (5) 9. Toktepa noktak
- (5) 10. Sen
- (6) 11. Benjong agi
- (5) 12. Telung nung rizünga ayu
- (4) 13. Tebang nung enok
- (4)

OLONG PAITEP # 5411 TELANGZÜBA


TIPILEN :

1. Aben, 4. Artsü, 7. Lisem, 8. Liwa,
9. Sarasadem, 12. Aket, 14. Mangu,
15. Anünü, 16. Ango.

LANGTSÜNGLEN :

1. Aruli, 3. Balala, 5. Suwar, 6. Belem,
9. Sujuk, 10. Aonung, 11. Dokan,
13. Tinu.

Agüja aliba noksa nung meputepi aliba 10 bushiang



TANÜBO NAI LANGZÜANG

Q. IMF (International Monetary Fund) indang Managing Director ji shiba?

- A. Jim Yong Kim B. David Malpass
C. Kristalina Georgieva D. Robert Zoellick

YASHI ADOK TELANGZÜBA : 1976

Happy Birthday

TENÜNG : T.CHANGTONGYATET LKR.

Tasoba anogo : March 31.

Yim : Changtongya.

Talidak : Lower Agri Kohima.

Küm : 4

School : RDNUMS Kohima

Class : Nursery

Changtongür na küm pezü junga anir aruba asoshi Tsüngrem nem tenüngsang agütsür, ano arishi anogo temjena moajangma ta sarasademtsür.

- Temeim Ava Oba, nenu Sanger, Äü Azü, Otsü Obuo aser kinunger ajaki tepela tasoba salem abener.



Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

NAI-A YA METETTER MA?



COVID-19 wara temaitsü agi shirangertem mozüki anir aotsü asoshi Indian Army indang Western Command-i bus ka purapitetta yangluba noksa nung angur. Twitter sabang ajanga Indian Army indang Additional Directorate General of Public Information (ADG PI) sangdong ka ajanga angazükba agi, iba bus ya single entry ka den treatment chamber o ventilators, driver aser co-driver balala amentsüsa yangluba den külemi disposable seat covers aser janatem bendener endoktsüsa yanglua lir.

SUDOKU # 5455

6	3	1						
7		9	5	1				3
2	4		8	9		7	1	
5	2		9	3	7			
	6					8	5	
	7			5	2	4	9	
		7	1		9	6	4	
4	2		5	6	8			
8	6		7					

TELANGZÜBA # 5454

1	9	8	7	4	2	5	3	6
7	3	5	6	9	8	1	4	2
2	6	4	1	3	5	8	7	9
8	4	1	5	2	7	6	9	3
9	2	3	4	6	1	7	5	8
5	7	6	3	8	9	2	1	4
4	8	7	2	1	3	9	6	5
3	1	2	9	5	6	4	8	7
6	5	9	8	7	4	3	2	1

OJANG LUTEP # 5003

- PESEMT :
ESÜMRA :
KNAHONG :
AJAKTSNGZÜÜ :
ECMHI :
KBANZTEÜJI :
BAGATTANET :
JUTANG :
JAANGA :
SÜMA :

OJANG LUTEP TELANGZÜBA # 5002


TAKÜM NUNG ASENI AJANGSHIBA TIMTEM BALALA
KOKTETSÜSA TSÜNGREMI LENMANG LAPOKTSÜTSÜ

Anü ita petinu ajanga alima nung tsüngsang mopung melenshidaktsüba ama nisunger tia-a melenshidaktsür ta anü ita petinu tetzürtemi ashir, parnoki ashibaji shidak asü tai'ar nai-a na asoba ita anogo den tanü nü tia medemdangang (Horoscope):



Aries
21/3-19/4

Tanü temelenshi kar ajangshitsü akok. Nisung tasen kar ajurutsü akok. Tanü tensa nung terenlok den liromedema alitsü merangtsüla.



Taurus
20/4-20/5

Tanü senotsü jenjang junga asadangtsü anogo tajung asütsü. Oset tejen kar tasen agi melentsü junger. Na teinyakdak mapa nung sen tera ajangzüktsü akok.



Gemini
21/5-20/6

Tanü nü dak talenba kecha malitsü. Anepdang tsütsü temulung mangmanger alitsü saka nai aji koktettsü. Nü sentong melenshiba ajanga tangar aoksatsü.



Cancer
21/6-22/7

Nü wadang balala nung tanga mapang dang nungi tenendakba inyaktsüla. Na tang aliba yimya agi lakra melenshitsu merangtsüla. Tembar tasen ka yimtettsü akok.



Leo
23/7-22/8

Tanü nü teimla tali ulushitsü. Tembar tejentem den tesendaktep ayutsüla. Nü dak tepela shisatsü ka aniochtsü merangtsüla.



Virgo
23/8-22/9

Tanü nai memetetba mapa ka nung mezüng tetsüng ajemoktsü akok. Tangar dang nai meteta aliba mimbanga teyu. Taküm asoshi jenjang tasen ka ngutettsü akok.



Libra
23/9-22/10

Tanü ya na asoshi tia tajung anogo ka asütsü. Ajak yutsür nü dak keta aliba sempet amshitsü merangtsüla. Taküm asoshi lenmang tasen ka yatettsü akok.



Scorpio
23/10-21/11

Tanü nai mapa tasak kar tenzükntsü akok. Nai shisadanga shimtetba mapa nung temoatsü alitsü. Tera arendaka bilemba business nung mezüng yongi mamdaktsüla.



Sagittarius
22/11-21/12

Tangar den lokteper inyakba mapa nung temulung tali agütsütsüla. Tangari na ajanga temelenshi agütsüba meteta akümtsü. Nai ashiba nung tangari mashishitsü.



Capricorn
22/12-19/1

Tanü mapa tasen melentsü anogo tajung asütsü. Office tulu kar nung na ajanga terenlok mesüra tajanzük agütsütsü akok. Nü den lanur kar inyaksemtsü.



Aquarius
20/1-18/2

Tanü na benjung kar nung adentsü akok. Nü tenük kanga küranga alitsüla. Anisüngzüktsü asoshi anogo tajung asütsü.



Pisces
19/2-20/3

Tanü kibong atema bendanga agüja inyaktsü mapang tajung asütsü. Nai bilemba sentong tanga agi melentsü akok. Nü shisatsü agi na azüktsü merangtsü.


Kartik Aaryan-i sen crore 1 tenla agütsütsü nangzük

Metsüremi/March 30, 2020

(Agencies): Bollywood nung nungtugu nisungtem rongnungi PM-CARES Fund atema tenla agütsür rongnung Kartik Aaryan densemogo. Actor-i Hombarnü coronavirus tashidak anema raraba nung teyari agütsütsü atema sen crore ka 1 tenla agütsütsü nangzükba metetdaktsüogo.

Pai Twitter ajanga iba osang lemsatepogo. "Linük ka ama longjemer nokdaktsü tang kanaga nungdaka kümogo. Tanü ni kechi jenjang nung lir aser ni sen kwi aateta lir, iba ya India nunger nüburttem ajanga lir; aser asenok atema ni PM-CARES Fund nem sen crore ka tenla agütsür. Ni lisopurtem dang pei akokba yari teyari agütsütsü mepeshir," ta pai tweet asü.

Mapang tatsüka tejakdang Anushka Sharma aser Virat Kohli natia COVID-19 tashidak anema raratsü atema Prime Minster aser Maharashtra Chief Minster's relief funds nongita yaritsü nangzükogo. Kasa mapang nung Rajkummar Rao-i, PM Relief Fund, CM Relief Fund aser



Zomato Feeding India nem tenla agütsüogo, saka pai tenla agütsüba mesangdong. Salman Khan-i Federation of Western India Cine Employees (FWICE) kübok anogoshia ayanger nisung 25,000 nem teyari agütsütsü nangzükogo, shirnok linük ajunga mokdang aliba ajanga kanga mejungi kongshir lir, ta tir BN Tiwari-i

ashi. Ano anogo ishika tejakdang Akshay Kumar-i sen crore 25 tenla agütsüogo, koba Bollywood actor temi tenla agütsüba rongnung tang tashi nung sen timtiba asütsü. Kasa mapang nung south film industry nungi actor tem rongnungi Rajinikanth, Pawan Kalyan, Prabhas, Mahesh Babu aser Ram Charan nungeria sen tenla agütsüogo.

Shaktimaan sequel ka yanglutsü: Mukesh Khanna



Metsüremi/March 30, 2020

(Agencies): Ramayan aser Mahabharat tanaben sayu tenzükba sülen nüburttemi India nunger mezüngbuba superhero drama Shaktimaan sayutsü asoshi akhang tenzükogo.

Nüburttemi aikati iba show sayutsü akhang tenzükba sülen Mukesh Khanna, shibai serial nung Shaktimaan shilem agiogo, pai iba serial sequel ka yanglutsü asoshi sentong yangludat, ta ashi.

Bombay Times den

interview ka nung actor-i, Shaktimaan second edition adoktsü asoshi joko mapang tatsükabo sentong yanglu arudar, ta ashi.

"Shaktimaan second edition adoktsü asoshi onok küm asemshi inyaktepa arudar, koba tanü asüng dak ajemdaker asütsü saka t a m e n d a k d a k b o memelenshitsu, kechiyong nüburttemi ibaji janngar. Iba timtem mapang süitemba sülen onok mapang inyak tenzükdang ni jenjang

tajungba ka nung alitsü, kechiyong taoba mapang dang nungi tanabuba shilem dak tali imlatsü," ta pai ashi. 2013 küm arishi küm 61 tain actor-i Indian Express dang pai superhero film ka yanglutsü bilemdar ta shiogo, ajisüaka pai imlaba ama senotsü peria mongutetba ajanga telefilm ka-ang yanglu. Shaktimaan ya superhero television show ka liasü koba DD 1 nung sayua liasü. Iba show ya 2005 küm tashi nung episode 520 sayuogo.

TAN HOPTA ATEMA - KOMA SÜLA ?

Q. Coronavirus tashidak mesen alitsü südi ta temulung melemi bilemertem tendanga anogo ishika tesem balaka nung anidena ayutsü (quarantine) atema arogo shiai pei arogo tenla ki mesüra guest house mela nunga koma süla ?

COVID-19 timtem ajanga Joe Diffie o Alan Merrill na süogo



Joe Diffie

Alan Merrill

New Delhi, Metsüremi/March 30, 2020 (Agencies): Grammy takok angusang country kentener mongin Joe Diffie coronavirus tashidak agi shirangba ajanga Deobarnü asü. Pa arishi küm 61 liasü.

Joe indang official Facebook page ajanga iba osang sangdong, kong coronavirus dak sendakba timtem balala mekokteti pa Deobarnü süadok, ta metetdakja liasü.

Joe Difie masüadang anogo ana tejakdang Honibarnü, pai Facebook sabang ajanga pa dak iba wara tejangja putetba osang lemsatepa liasü.

"Kü dak coronavirus tashidak tejangja tendangtetba sülen, ni tang treatment tagidak lir aser medical mongintemi ni anepaludar," ta Joe-i

metetdaksü.

Diffie, shiba 1958 küm December 28 nü Tulsa, Oklahoma, United States nung soa intet, 1990s mapang 'John Deere Green', 'Pickup Man', 'Prop Me Up Beside the Jukebox (If I Die)', 'Honky Tonk Attitude', 'Bigger Than the Beatles' aser 'If the Devil Danced (In Empty Pockets)' kentem densema pa atenba ken aika alimai jangjaa takok tajung ngua lir.

Asür Joe indang mezüng kensep 'A Thousand Winding Roads' ya 1990 küm sayaa liasü.

Joe-i pa kinungsü Tara Terpening Diffie, aser mapang balala nung pai pezüben tashi kibong akümdang sosemba chirnur tenet tashi yutsür süogo.

Maneni, nüngtugu ken 'I Love Rock 'n' Roll' zülusang aser atensang America nung Alan Merrill-a COVID-19 tashidak mekokteti Deobarnü arishi küm 69 nung asü, ta sangdong ka ajanga jangjatsüogo.

Alan asüba osang ya pa jala Laura Merril-i la Facebook page ajanga lemsatepa liasü.

Kentener telok 'The Arrows' nung asür Alan ya züngsem ka liasü aser osang ajanga angazükba agi, pa iba band nung aliba mapang, pai 'I Love Rock 'n' Roll' ken zülü, koba band-i 1975 küm sayaa liasü.

Merrill asüba osang angazüka, America tsür kentener/kenzülur Joan Jett-ia Instagram ajanga mangyim tejashi lemsatepogo.

SpaceX-i hand sanitizer aser mask tem yangludat

Metsüremi/March 30, 2020 (Agencies): Coronavirus wara prokshiba azioktsü asoshi Elon Musk meyong space research company SpaceX-i hand sanitizer aser face mask tem yangludat, ta sangdong ajanga metetdakja liasü.

CNBC sangdong ka ajanga angazükba agi, "COVID-19 coronavirus tepsettsüsa CDC tuyubatem ajanga melaba ama" Tesla-i hand sanitizer tem yanglua lema agütsüogo. Taoba hopta iba space research company-i face shields/mask 75 yanglu aser Hawthorne, California kübok company indang headquarters anasa Cedars Sinai nem agüja liasü.

Kasa sangdong ajanga angazükba agi, mozüki nung inyakertem atema company-i "tyvek" ta nüngja agütsüba teküzmüksü suit tem lema agütsüogo.

Iba mapatong tasen den bendenloksema, Tesla employee temi American Red Cross Society den longjemer tan hopta tatemlen Hawthorne nung 'blood drive' sentong ka ayongzüksü ternemba lir.

Ano, Tesla-isa China nungi



Elon Musk

alizükba ventilator 1000 shi California tonga bener arua lema agütsüogo.

Maparen balala inyakba dak alaka, Elon Musk-i America kübok hospital balala nung N95 mask 250,000 tashi tenla agütsütsü nangzükogo. Item mask rongnung Elon-i mask 50,000 jungnüa University of California, Los Angeles (UCLA) Health Hospital nem agüja liasü.

Musk-isa, ventilator tem yanglutsü asoshi Tesla indang New York giga-factory ya tanaben takaratiba nung lapoktsü. Iba ama timtem tensa ka nung teyari agütsütsü asoshi onoki akok tashi tajungba inyaktsü tebilemba lir.

Camera asem aketba Samsung Galaxy M11 sangdongogo

Metsüremi/March 30, 2020 (Agencies): Electronics yangluba company tetsüti Samsung-i smartphone ka meimbanga sayaba sangdongogo. Company indang UAE official website list nung Samsung Galaxy M11 ya züngoksemogo. Iba phone sangdongba dak alaka, osang agütsüba mapang tashi nung company-i smartphone indang jenjang aser shishilembadak ayoktsü asoshi anogo tejangja ka metetdakja meliasü.

Samsung Galaxy M11 nung punch-hole display aser tesülen fingerprint sensor keta aliba angutsü. Smartphone ya sentsü asem - black, purple aser blue nung angutsü. Smartphone indang list ya GSMarena-i mezüng ngua liasü.

Tanga shishilembadak Galaxy M11 sayatsü asoshi

osang metetdakja mali.

Iba dak sendakba nung, company-isa Japan nung Galaxy A41 aser India nung Galaxy A31 sangdonga liasü, saka iba mapang parnoki handset jenjangtem memetdaksü.

Galaxy M11 nung 6.4-inch HD+ LCD display den Infinity-O cutout keta lir. Iba handset ya 1.8GHz nung clock süa yangluba octa-core processor ka ajanga achaayangtsü, saka iba processor tenüng agüja mali. Taoba mapang osang balala ajanga angazükba agi, iba smartphone ya Qualcomm meyong Snapdragon 450 processor ka ajanga run asütsü.

Handset ya variant ana den 3GB RAM + 32GB storage aser 4GB RAM + 64GB storage nung angutsü. Galaxy

M11 nung 512GB tashi memory atsülanga amshitsüsa microSD card ka inoka yanglutsüogo.

Camera tsütsü reprangdangra, Galaxy M11 tesülen triple camera setup - 13-megapixel primary sensor, 2-megapixel aser 5-megapixel sensors keta aliba angutsü. Selfie janrartem atema handset tejaklen 8-megapixel camera inoktsüogo. Camera indang features rongnung 'Live Focus', wide angle aser ultra wide angle modes tem keta aliba angutsü.

Samsung Galaxy M11 nung 5,000 battery den 15W fast charging angutsü, koba USB Type-C port ka ajanga charge asütsü. Connectivity atema, handset nung dual SIM support, 4G LTE, USB 2.0, Bluetooth 4.0 aser 3.5mm headphone tem inoka yanglutsüogo.

Anushka o Virat Kohli nati sen cr. 3 tenla agütsü



Metsüremi/March 30, 2020 (Agencies): Alima ajanga asüngba wara - COVID-19 azioktsü mechi Actor Anushka Sharma aser la kinungbo Virat Kohli nati Prime Minister Narendra Modi indang PM-CARES fund nung tenla agütsüba sangdonga liasü. Apuani yagi sen cr.3 tenla agütsü, ta sangdong ajanga metetdaksü.

Instagram ajanga Anushka-i, "NI aser Virat nati PM-CARES Fund & Chief Minister's Relief Fund (Maharashtra) nung tenla agütsütsü nangzükur. Meimchir timtemba ngua onok mulung raksar aser kunati tenla agütsüba ajanga timtema alir külem sensopurtem lenmang ka nungbosa nungita yaritsü imlar #IndiaFightsCorona," ta lemsatep.

Linük nung coronavirus den raratsü asoshi Bollywood industry nungi tongtibang nisung aikati teyari agütsütsü nangzükur lir. Item tongtibang nisung rongnung actor Akshay Kumar-a densema lir. Honibarnü Akshay-i PM-CARES Fund

nung sen cr. 25 tenla agütsütsü sangdonga liasü.

Kesari nung tongti shilem agisang Akshay den külemi Varun Dhawan-ia Twitter sabang ajanga PM-CARES Fund nung lakh 30 tenla agütsütsü nangzükogo. Kasa mapang Karan Johar, Ayushmann Khurrana aser designer Sabyasachi Mukherjee nungeria iba wara den raratsü asoshi tenla agüja liasü.

Tang linük nung maparen shibangtsür aliba ajanga film aser TV industry nung inyaker nisung 25000 mapa meli kümadok aser iba ama mapang ka nung Salman Khan-ia parnok ajak lenmang balala ajanga yaritsü asoshi nangzükur liasü.

Taoba mapang, Anushka aser Virat nati, iba ama tensa ka nung kima yimdonglen mesenzüi kidang kilung nung kazütsü asoshi video ka ajanga fans tem ajungshia liasü. Iba wara azioktsü asoshi Ato Kilonser Narendra Modi-i 'Janta curfew' sangdonger sülen anogo ka lir Virat o Anushka nati iba osang lemsatep.



Metsüremi/March 30, 2020 (Agencies): COVID-19 wara azüoktsü linük nung maparen ajak shibangtsü aliba mapang, Disha Patani aser Tiger Shroff na indang fans temi tena ya külemi munga alitsü ama bilemba lemsatepogo. Malang nung shilem agila aser Disha Patani-i Baaghi 3 actor Tiger Shroff den kazür ta olulu osangtem prokshidar. Ajisüaka, tenati iba osang ya shitak masü ta jangjatsüogo.



Bhubaneswar (Odisha), March 30, 2020: Hombarnü Odisha yimtiba, Bhubaneswar nung tanabuba Budget senden nung adentsü atema MLA tem masks agir State Convention Centre-i aruba noksa nung angur.

India nung nisung 1,071 dak Covid-19 putetogo; nisung 29 süogotate 6 nung nisung 106 dak coronavirus putet; nisung 6 asü: Health ministry

New Delhi, March 30 (Agencies): Hombarnü Centre sorkari, March 30) tashi nung India nung nisung 1,071 dak coronavirus tashidak putetogo aser iba tashidak agi asürtem 29 jungogo, ta Union Health Ministry-i metetdaksü. Tang Covid-19 agi shiranger nisung 942 lir, nisung 99 anepadokogo aser kabo bendangleni ogo, ta Health Ministry-i metetdaksü.

Hombarnep 10:30 ako meta Ministry-i, tanü Maharashtra nung iba tashidak agi ano nisung ana süogo, ta metetdaksü.

Tang tashi nung iba tashidak agi timba asüba state ji Maharashtra lir (nisung 8); iba sülen Gujarat nung nisung pongu, Karnataka (3), Madhya Pradesh (2), Delhi (2), Jammu & Kashmir (2) aser Kerala, Telangana, Tamil Nadu, Bihar,

West Bengal, Punjab aser Himachal Pradesh state shia nungi nisung kaka süogo.

India nung iba tashidak putetba nisung 1,071 nungji bendanger-a 49 densema lir.

Tang tashi nung iba tashidak timba putetba state ji Kerala (194) lir, iba sülen Maharashtra (193), Karnataka (80), Uttar Pradesh (75), Telangana (69), Gujarat (58) aser Rajasthan (57) lir.

Delhi nunga nisung 53 dak iba tashidak putetogo; Tamil Nadu nung nisung 50, Punjab nung 38, Haryana aser Madhya Pradesh naprongla nung semer asemsem (33) dak iba tashidak putetogo.

Maneni Jammu & Kashmir nung nisung 31, Andhra Pradesh nung 19, West Bengal nung 19, Ladakh nung 13, Bihar

ning 11, Andaman & Nicobar Islands nung 9, Chandigarh nung 8 aser Chhattisgarh o Uttarakhand naprongla nung tenetnet dak iba tashidak putetogo.

Goa nunga nisung pongu, Himachal Pradesh aser Odisha na nung asemsem, Puducherry, Mizoram aser Manipur nung kaka dak iba tashidak putetogo, ta health ministry-isa metetdaksüogo.

Hombarnü Ato kilonser, Modi-i video conferencing ajanga India nung diplomatic missions tongti ketdangsertem den linük nung COVID-19 tensa atema shisa lemsatepogo. Iba senden nungji External Affairs Minister, S Jaishankar aser Foreign Secretary, Harsh Vardhan Shringla nata densema liasü.

CWC senden nung Covid-19 atema jembitsü

New Delhi, March 30 (Agencies): April 2, 2020 nü Congress Working Committee (CWC) senden amenba mapang nung Congress nung tongti lenirtemi linük nung coronavirus nokdangtsü atema anogo 21 linük tesem ajak shibangba ajanga nüburtemi timtem balala ajangshiba indang o lemteptsü, ta osang ka ajanga metetdaksü.

April 2 nü Congress

working committee (CWC) sendenji video conferencing ajanga agitsü aser iba senden nungji coronavirus tensa atema jembitsü, ta AICC general secretary, KC Venugopal-i twitter ajanga metetdaksü.

Coronavirus anema linük shibangba ajanga timtem balala adokbaji sorkari ketdangtsüa inyaker, aser iba dak sendakba nung Congress-i sorkar inyakyim aija arudar.

Congress-i, sorkari linük tesem ajak shibangba ajanga rongsenkettsüing dak sendakba inyakyim ajak anenogo aser iba ya ajanga aayangertem, sensakertem aser mokokmeinertemi timtem balala ajangshidar, ta metetdaksü.

Tangalen nungi aayangertem khuret pungbadaktsütsü atema sorkari tim teinyaktsü meinyaker, ta Congress-i aitsü.



East Champaran (Bihar), March 30, 2020: Coronavirus tashidak nokdangtsü atema linük tesem ajak shibanger aliba mapang nung nisung senzüba nokdangtsü atema India-Nepal arrtsülen attsü atsüer lia Hombarnü Raxaul, East Champaran nung tangalen nungi aayangertemi ketdangsertem den jembiba noksa nung angur

Anogo 21 linük shibangba sülen atsülangtsü tebilemba mali: Centre

New Delhi, Metsüremi/ March 30 (Agencies): Hombarnü Centre sorkari, Coronavirus tashidak anema linük tesem ajak anogo 21 shibangba sülen ano maneni atsülangtsü atema sorkar tebilemba mali, ta metetdaksüogo.

Tang tashi nung India nung nisung 1000 dak tema dak novel coronavirus tashidak putetogo.

Press Information Bureau (PIB), Ministry of Information & Broadcasting-i twitter ajanga, media osang ajanga sorkari linük shibangba anogo ano atsülangtsü ta osang prokbaji tai, ta Cabinet Secretary, Rajiv Gauba-i shiogo, ta metetdaksü.

Ministry-i, "Anogo 21 linük

shibangba sülen sorkari ano atsülangtsü ta olulu jembir aser media osangtem lir. Item osangji tai aser tamendakdak maka, ta Cabinet Secretary-i shiogo," ta metetdaksü.

Cabinet Secretary, Gauba-i, "Item osang ngua ni süngmanger, linük shibangba atsülangtsü sentong mali," ta metetdaksü.

India nung coronavirus tashidak nokdangtsü atema taoba hopta Ato kilonser, Narendra Modi-i linük tesem ajak anogo 21 shibangtsü sangdonga liasü.

Ato kilonseri iba sangdong metetdaksüba sülen tangalen nungi yimti balala nung aayangertem mapa makai pei yimtsüingi otepdar.



New Delhi, March 30, 2020: India nung coronavirus anema linük tesem ajak shibanger aliba mapang Hombarnü Paharganj, New Delhi nung sensakertem nem chiyungtsü angati lema agütsüba noksa nung angur.

Centre-i gari company tem dang ventilators yanglutsü mepishiogo

New Delhi, March 30 (Agencies): Central sorkari gari yangluba company tem dang parnok facilities nung ventilators yanglutsü atema mepishiogo.

Centre sorkari item company tem dang, linüki coronavirus anema raraba tashi itshitsü atema item ama machines yanglutsü mepishi.

Hombarnü Health Ministry-i, taruba hopta tsüingda Defence Research and Development Organisation (DRDO)-i anogo shia N-95 mask 20,000 yanglutsü, ta metetdaksü.

Ministry-isa, linük nung aliba hospital balala nung coronavirus tashidak agi shirangertem atema tang aliba ventilators 14,000 dak tema lemkütsüogo aser tang N-95 mask lakh 11.95 rizünga lir, ta metetdaksü.

Tesüiba anogo ana tsüingda item mask lakh 5 lemtsüogo aser Hombarnü lakh 1.40 lemtsüogo.

Health Ministry-i twitter ajanga, "Gari yangluba company tem dang ventilators yanglutsü mepishiogo aser parnoki iba atemaji inyakdar," ta metetdaksü.

Iba dak alia Health Ministry-i Ministry of Defence kübok Bharat Electronics Limited

(BEL) danga taruba ita ana tsüingda ventilators 30,000 yanglutsü tuyuogo, ta metetdaksü.

Agva Healthcare, Noida danga ita ka tsüingda ventilators 10,000 yangluang ta tuyuogo.

April ita tanabuba hopta nungi parnoki supply asütsü imlar, ta Ministry-i twitter ajangasa metetdaksü.

Ano linük nung company anati anogo shia N-95 mask 50,000 yangludar aser taruba hopta tashi nungbo parnoki anogoshia item masks lakh kaka yanglutsü imlar, ta Ministry-isa metetdaksü.

Red Cross-i agütsüba personal protection equipment 10000 agizüka Hombarnü lemogo.

Anogo ishika tejaklen Invest India Agency-i, Coronavirus anema raratsü atema India-i tajemtiba agi mask million 38 aser personal protective equipment million 6.2 bosa nüngdaker, ta sangdonga liasü.

Invest India agency-isa, item ama kanga nüngdak oset supply asütsü atema parnoki ventilators, ICU monitors, protective equipment, masks aser testing kits yanglutsü atema company 720 ajuruogo, aser tang tashi nung company 319-ibo melungogo, ta metetdakja liasü.



Wellington, Metsüremi/March 30: New Zealand Ato Kilonser Jacinda Ardern-i Wellington, New Zealand nung March 30, 2020 nü COVID-19 indang osangbener senden ka nung jembiba noksa nung angur. Hombarnü New Zealand nung nisung 76 dak Covid-19 puteta iba linük nung coronavirus agi meneper nisung 589 kümogo. Item rongnung nisung 12 mozüki nung lira ser ana Intensive Care Unit nung lir.

COVID-19: Spain aser Iran nung nisung noklang dak tema asü

Metsüremi/March 30, 2020

(Agencies): Iran nung coronavirus agi asür nisung 2,757 jungogo, kong ghonda 24 tsüingda nisung tasen 117 asüba osang sangdonga lir, aser kasa mapang Spain nunga nisung 812 süa tang tashinung COVID-19 agi asür nisung 7,340 kümogo.

US nung coronavirus agi nisung 100,000 dak tema asütsü akok, ta health ketdangsertemi tekümdangtsü ashiba sülen US Tir, Donald Trump-i nüburtem loktiliba nungi pila alitsü federal guidelines ya April 30 tashi atsülangtsüogo.

Iba tashidal agi kanga sashia kongshia aliba New York yimti nung nisung 1,000 dak tema asüba sülen Deobar nikongdang iba osang ya sangdong.

Mezüng anogo 15 atema sangdongba Hombarnü tembang.

US nung nisung 139,000 dak coronavirus aliba jangjaogo aser tanga linük kata nunga yamaji puteta mali, kong nisung 2,400 dak tema süogo.

Iba tashidak wara pokteter tang tashinung alima nung nisung 718,000 dak coronavirus agi menepa lir, aser nisung 149,000 shi taneptsü nguogo aser nisung 33,000 dak tema süogo.

Belgium nung novel coronavirus agi asür nisung 500 jungogo aser nisung 12,000 jungnüa dak puteta lir.

Nisung million 11.4 aliba linük nung COVID-19 agi nisung 513 süogo aser laboratory test nung nisung 11,899 jangjatetogo, ta health

ketdangsertemi ashi.

Iba tashidak wara prokshiba ajemdaktsütsü mechi Belgium nung lockdown hopta ana atsülangshia April 18 tashi alitsü.

Libya nung nisung ti dak corovirus putetba sülen iba tashidak wara prokshiba nungi ajemdaktsütsü mechi tepuokdak alir nisung 450 dak tema chiokogo.

Deobarnü justice ministry ajanga sangdong ka nung, Tripoli nung aliba tepuokdak alir nisung 466 chioktsü ketdangsertemi lemtet, ta ashi.

United Kingdom Ato Kilonser Boris Johnson ondang senior adviser Dominic Cummings dak COVID-19 indang symptom aliba ajanga lokti nungi pila alir.

Hokulbarnü Johnson dak iba virus putetba osang sangdonga liasü. Pa indang health minister Matt Hancock daka coronavirus putt aser chief medical adviser Chris Whitty ya lokti nungi pila alir.

Russia nung iba tashidak ya nisung 1,836 dak puteta lir aser nisung teku süogo.

Moscow nung alirtem dang ketdangsertemi Hombarnü nungi tenzüka kilung nung alitsü metetdaksü aser linük tesem balala lena kasa mera agitsü tebilemba lir.

Iran nung tesüiba ghonda 24 tsüingda coronavirus agi nisung 117 süa tang tashinung iba linük nung COVID-19 agi asür nisung 2,757 jungogo, aser nisung 41,495 dak iba tashidak puteta lir, ta health ministry

ajanga ashi.

"Tesüiba ghonda 24 tsüingda coronavirus agi nisung 117 asü aser nisung 3,186 dak iba tashidak putet," ta ketdangserti ashi.

Spain nung Deobarnü tashinung nisung 78,797 dak coronavirus puteta liasü aser Hombarnü tashinung nisung 85,195 jungogo, ta par linük indang health ministry ajanga ashi, koba ajanga China dang timba akümer, kong nisung 81,470 dak iba tashidak wara puteta lir.

Soain nung iba virus yagi Deobarnü tashinung nisung 6,528 sür liasü aser Hombarnü tashinung asür ajak agi 7,340 kümogo.

Philippines indang health ministry ajanga ashiba agi, nisung tasen 128 tashi corovirus agi asü.

Linük nung asür ajak agi nisung 78 aser 1,546 dak puteta lir, ta Health Undersecretary Maria Rosario Vergeire-i ashi.

Thailand nung Hombarnep tashinung COVID-19 agi nisung teku süogo aser nisung 1,524 dak iba tashidak puteta lir.

Nepal nung nisung pongu dak iba tashidak puteta lir aser sorkari April 15 tashi linük tesem ajunga shibangtsü ozüng agütsüshiogo.

Korea Centers for Disease Control and Prevention ajanga ashiba agi, South Korea nung Hombarnü nisung 78 dak coronavirus outet. Iba linük nung tang tashinung nisung 9,661 dak iba virus ya puteta lir, kong nisung 152 süogo.

Al-Shabab teloki Somali indang governor ka tepset

Garowe, Metsüremi/March 30 (Agencies): Al-Shabab telungpuri tenüng agiba suicide bomb lendong ka northeastern Somalia nung ataloka ketdangser ka asü, ta police aser medical osang ajanga ashi.

Nugaal region governor Abdusalan Hassan Hersi ya Puntland yimtiba, Garowe nung mozü kidangi anir ao saka pa yiruba zübu nungi asü. Deobarnü iba lendong ya Puntland nung ataloka liasü.

"Doctor temi governor taküm kümzüksü merang saka tia maka pa yiruba zübu ajanga asü," ta Puntland nung police tanishir Mohamed Weli-i osangbener dang ashi.

"Pa mozü kidangi anir arudang temang kangasa mejungi yirur liasü," ta Mohamed-isa ashi.

Governor ya intensive care ward nung admit sür ghonda ka majungdang asü, ta mozüki nung inyaker kati ashi.

"Pa iba bomb apokba nung kanga mejungi yirur aser iba ama yirur kümzüksü lenmang kanga sademabo mali," ta osang ajanga ashi.

Kasa lendong nung taoba police tanishir ka aser civilian ka yirur aser tena mozüki nung anepaludar, ta ketdangsertemi Hombarnü ashi.

Lendong agütsür ya governor mena aliba gari alidaki asema oa temang nung alenloka aliba bomb pokdaksü, ta tenük kuli alirtemi ashi.

Al-Qaeda den sendaktepa aliba al-Shabab telok ya Somalia sorkar atsüngdoktsü asoshi rarar aser parnoki sangdong ka nung iba lendong atalokba tenüng agiogo.

Iba telok ya 2011 küm Somalia yimtiba, Mogadishu nungi atsüngdok aser parnok kübok aliba tesem timbaka sorkari atsüngdokogo, saka tesem tezülen aika parnok kübok lir.

Taliban teloki Afghan sepaitem tepset

Kabul, Metsüremi/March 30 (Agencies): Afghan north aser south tsütsü Taliban teloki lendong agütsüba nung Afghan sepai aser police tajemba agi 11 tepsetm ta linük defence ministry aser provincial ketdangsertemi Hombarnü ashi.

Taoba hopta Afghan Tir Ashraf Ghani-i par züngsem 21 aliba team ajanga Taliban den yimjung ken o jembitsü, ta sangdonga liasü, koba yimtsüren nung pa den tokteper Abdullah Abdullah-i magizük. Tawa lendong agütsüba nung Taliban teloki tenüng agia mali.

Defence ministry ajanga ashiba agi, tsükchirtemi Deobar aonung southern Zabul province kübok Arghandab district nung aliba military checkpoint ka nung tenük yoker amak amakdang sepai tajemba agi trok asü.

Maneni northern Baghlan province yimtiba, Puli Khumri tezülen checkpoint ka nung Taliban teloki amakdang sepai züngsem pongu asü aser trok yirur, ta provincial council züngsem Mabobullah Ghafari-i ashi. Iba lendong ya Deobarnü atalokba lir.

Hombarnüa gari nung inoka aliba 'sticky bomb' ka linük yimtiba, Kabul nung poka nisung pezü yirur, ta Kabul police tekolakba indang odongtar Firdaus Faramraz-i ashi.

Afghanistan yimtenren nung mangatetep adoka aliba aser Ghani aser Abdullah na tsüingda mangatetep aliba ajanga Taliban den jembishinütsü mera atsülanga aor, koba Washington-i taoba ita Taliban telungpur den yimjung tezüngzüktep agiba nung shia lir.

Iba tezüngzüktep nung Afghanistan nungi US sepai

ajak (13,000) anizüker aotsü aser iba melen Taliban-i Afghan li amshiba US anema inyaksangshi masütsü ta shia lir. Iba tezüngzüktep ya Afghanistan nung küm 18 raraba tembangtsü asoshi maongka tajungtiba ta züngshir, koba US-i Afghanistan amakba sülen tenzüka liasü.

Saka ita tetenzüklen Ghani aser Abdullah nati pei pei sasep nung takok angu ta sangdonga tenaprong linük tir ama tezüngzüktep agiba ajanga yimten tashi atsütep tenzük aser tena lungjemer meinyakra Afghanistan nem sen billion \$1 alang teyari agütsütsü aliba agientsü, ta Washington-i metetdaksü.

Kabul north tsütsü Bagram nung US-i aniba teloktep sepaitem amenoka lir aser yangji tepuokdak yua aliba Taliban züngsem chiokba anepalutsü asoshi Taliban-i teshimtet nübu ter yoktsüla. Item tepuokdak alir chioktsü ya US den tenzüngzüktep agiba nung shilem ka lir, kong Taliban züngsem tepuokdak aliba nisung 5,000 chioktsü aser Taliban-ia parnoki pua aliba sorkar ketdangser aser Afghan sepai 1,000 ya chioktsüla.

Afghan National Security Adviser indang office ajanga Hombarnü ashiba agi, Taliban nunger tepuokdak aliba chioktsü asoshi tejak o tejak jitepa jembishinütsü atema technical team ka Kabul-i yoktsü, ta Afghan ketdangser aser Taliban tsüingda video conference agidang mulungtep.

Iba maparen nung International Committee of the Red Cross ajanga teyari agütsütsü, ta ashi.



Dhaka, Metsüremi/March 30: Dhaka, Bangladesh nung aliba Hazrat Shahjalal International Airport nung March 29, 2020 nü Jack Ma Foundation aser Alibaba Foundation nungi medical supply bener arutsüba ketdangsertemi agizükba noksa nung angur. COVID-19 prokshiba nokdangtsü mechi Jack Ma Foundation aser Alibaba Foundation ajanga Dhaka nung aliba Chinese Embassy den lungjemer Deobarnü Bangladeshi Ministry of Health and Family Welfare nem medical osettem tenla agütsü. Item osettem rongnung COVID-19 testing reagents 30,000 aser Mask 300,000 dena lir.

**GOVERNMENT OF NAGALAND
DIRECTORATE OF HEALTH AND FAMILY WELFARE**

No. H&FW-27/B-30/nCoV2020(Pt)/957-63 Dated Kohima, the 30th of March 2020

M E P I S H I R

Alima ajungalen COVID-19 wara prokshiba mapang ka nung, medical wadang nungi anisungzüka alir, medical doctors, nurses, laboratory technicians, radiographers, pharmacists aser ano final year nung azünger medical kaketshirtem den külemi kidang temungdak PG kaketshirtem dang Nagaland nung alirtem atema aria bilema mulungsoa yariteptsü atema Department of Health and Welfare Nagaland-i mepishia metetdaksür. "Temalen agüja aliba medical wadang nung nübo shirnokisa mulungsoa teyari agütsünür, nenoki nai yarinüba osang tejanga, tsünglanglen agüja aliba format nung zülür iba ph.no **9402245812** nung WhatsApp ajanga yoktsü metetdaksür.

1. Name :
2. Age / Gender :
3. Technical Qualification(s) :
4. Present Address :

MENUKHOL JOHN

Principal Secretary to the Government of Nagaland
Health and Family Welfare Department
Dated Kohima, the 30th of March 2020

PELABA METETDAKTSÜR

Aso:
03.12.1937

Asü:
26.03.2020



**"Ni rara tajungji raraogo, ni alizüng tonga asemogo,
ni tamangji yuogo" - 2 Timoti 4:7**

Onoki kanga meima aliba kinungbo aser tsürabur asür **A. Tarepliba Ozukum** (Molungyimsen) shirangba mapang aser pai iba akümüli toktsür aodang ozü den sarasadem, nübo, shisatsü aser senotsü agi yariteper ajak dang ozüi kangasa pelaba metetdaksür.

Tulusang Tsüngremi nenok ajak moajang ta onoki sarasadem.

-Temeim kinungertem

Nüngdakba osettem bener aliba truck ana Kipheri tongogo



Dimapur, Metsüremi/ March 30, 2020 (TYO): Nüngdakba osettsüsetem sünga oshir aliba truck ana March 30, 2020 (Hombar) nü Kipheri District tonga liasü, ta sangdong ka ajanga metetdaksüogo.

Osettsüsettem grocery dokantem nung peria angutsü,

anungji Kiphiri nung alir nüburtem dang chiyongtsü mangutsü ta bilema aoksa malitsü atema metedaksür.

Lijaliyongtsü asoshi ghonda ana ya kanga petakra asünung, Hombar anepdang nungi tenzüka, dokan aser bazaar tem ghonda 4 tashi lapkokja liasü.

Taoba mapang agütsüba ama, kibong shia dang jangotsü seret 10 alitsü asoshi temelaba agütsü.

Osettsüsettem lijaliyongba mapang nüburtemi kati ka dak khenyongi mekongshi tetetsüngda yur shishilembatep, ta kasa sangdong ajanga metetdaksüogo.

GPRN-i asükhu lemsateper

Dimapur, Metsüremi/ March 30 (TYO): Asalu nung asoshi pai bendanga tesem kübok Beisumpuikam agüja inyakba atema pa tenüng yimtsüng nungi Naga Army Naga nung puti otsü nung Kiusumong Battalion nung teti tetshitsü aser pai taküm tenzüker Captain Riakeukam tenla agütsüba ajaki Pame (Naga Army No. IJ-18398) March 27 nü asüba Office of the Longvibu, osang angazüka Government Naga Army-i, pa nem pai of the Peoples' Republic of Naga lima asoshi bendanga agüja inyakba temaitsü Major jenjang agütsür.

GPRN-i asür kibong den züngoksema liasü. asükhu lemsateper aser tulusang Tsüngremi pa tanüla Pai masü tashi Naga tesünep nung anisungzükdakja nung matsüngshi tenzüko. ta sarasademtsür, ta MIP, Pa asüba kanga menungraa NSCN/GPRN sangdong ka bilemteter aser pa melener ajanga metetdaksü.

Khonoma Youth Organization aser Youth Organization nati khukua aitsür

Dimapur, Metsüremi/ March 30, 2020 (TYO): Dimapur nung March 16, 2020 nü (Hombar) züngsem tajung, Er Kevinguto Khate dang taochi mesayui tepsetba yutsüba osang angazüka Khonoma Youth Organization (KYO)-i tejashi den iba tako marok lemsateper, ta Khonoma Youth Organization-i metetdaksü.

Asür Er Kevinguto ya sempet tajung aketba aser mapa meranga inyakba den ajaki meimba lanur ka liasü. Pa asüba ya par kibong aser Khonoma nung alir nüburtem atema dang masü saka Naga nung ajunga atema takoksa tulu lir. Pa taküm samaba ya kecha agia meyipa bener marutet aser iba ya ajanga par kibong nung ongdang tuluka adokdaksüogo.

Iba ama taochi mesayui aser nisung taküm ka mapayui tepseta yutsüba maparen ya KYO-i khukhua aitsür aser aibelenertem tekaratiba nung pua ozüng agi melaba ama tapet temerenshi agütsütsü asoshi ozüng amshir dang mepishir, ta

parnoki ashi.

Nüji tangatetba aliba lokti ka nung iba amala maparen magizüker aser ibala inyakim ya kija aser lokti ajungai aitsütsüla, ta KYO-isa shisem.

Ozüng-i melaba ama tim ketdangsertemi takaratiba nung ochi obendang agütsütsü imlar, parnokisa ashi.

Khonoma Youth Organization tenüng nung President Mhiesilhukho Yalie aser General Secretary Mhiesisokho Chase nati asür kibong den mangyim tejashi lemsateper aser Tulusang Tsüngremi asür kinunger ajak mulung nung tesünep agüjangma ta sarasademtsüba metetdaksü.

Maneni, Angami Youth Organization (AYO)-ia, March 16, 2020 anogo asür Rokozhasie Khate'er jabaso Er. Kevinguto Khate dak taochi mesayui tepseta yutsüba osang anagashia aoksaba lemsatepogo.

Tentet nung ajaki akhümtsüba züngsem, asür Khate ya National Institute of Technology (NIT), Chumoukedima, Dimapur

nung assistant professor ka ama inyaka liasü. Pa ya takok tajung anguba shisahir ka, shiba doctorate degree angutsüba den külemi lokti atema teimla ka liasü, ta AYO-i ashi.

AYO nung züngsem tajung dak taochi mesayui taküm agiba maparen ya tentet ajanga aitsür aser lokti tepor junga meraketa aliba raksatsütsü asoshi kari telok

nungi tajungtiba ka shimteta taküm samatsüba asalentong maparentem metetner, ta parnoki ashi.

"Iba ama ashikülak maparen ya onoki odangbo meyutsütsü, saka mapangshia lokti nung iba ama maparen atalokba anema noktaksü onoki renema lir. Iba maparen nung densema alir temulung meleme bilemertem aputsü asoshi police department dang

mepishiba mapang, aibelenertem tekaratiba nung pua ozüng agi melaba ama parnok nem ochi obendang agütsütsü asoshi onoki mepishir" ta AYO-isa metetdaksü.

Angami Youth Organisation-i asür kibong den mangyim tejashi lemsateper aser Tsüngremi mangyimer mulung nung tesünep agüjangma ta sarasademtsür.



Dimapur, Metsüremi/March 30, 2020: Corona Virus (COVID-19) wara azüoktsü asoshi, March 30, 2020 (Hombar) nü Lotha Baptist Churches Association (LBCA), Vankhosung, Executive Secretary, Rev.Nyanchumo Lotha-i Wokha, Deputy Commissioner, Orenthung Lotha nem tenla ama sen lakh 1 agütsüba mapang tangokba noksa nung angur.

Mary Kom-i PM National Relief Fund nem tenla agütsü NCA-i sen lakh 5 tenla agütsü



New Delhi, Metsüremi/March 30 (Agencies): India tsürtem rongnungi nungtugu boxing asayar aser Rajya Sabha MP Mary Kom-i coronavirus tashidak anema raratsü asoshi tenla agütsüogoo. Arishi küm 37 tain asayari ashiba agi, lai la indang MP Local Area Development Scheme (MPLADS) Fund nungi sen crore ka agütsütemelaba agütsüogoo.

Twitter ajangsa Mary-i la indang ita ka itasen Prime Minister's National Relief Fund nem tenla agütsüasangdongoo. Lai shiti anaprongla indang noksa den "# Stay Home # Stay Home Safe # IndiaFightsCorona," ta zülur lemsatsep.

Taoba mapang India team opener aser BJP MP Gautam Gambhir-ia MPLADS Fund

nungi coronavirus tashidak den raratsü asoshi sen croro ka agütsüogoo.

India nunger Table Tennis asayar Sathiyam Gnanasekaran-ia Hombarnü Tamil Nadu CM Relief Fund nem sen lakh 1 aser PM-CARES Fund nem sen 25,000 tenla agütsütem nanagzükogoo. "Tang ya ajak asoshi aser talisa anogoshia ayanga chiyongertem atema tetendangba mapang ka lir," ta pai tweet asü.

"Anungji ni sen 1,25,000 (Tamil Nadu Chief Minister's public relief fund & amp lakh 1; PM Cares fund sen 25,000) agütsütem nanzükoo."

Kasa mapang nung Indian Olympic Association (IOA)-ia COVID-19 anema raratsü asoshi linük nem teyari agütsütem nanzükogoo aser ashiba agi national federations

asertate affiliates temaia teyari agütsütem.

Manu Bhaker-ia Haryana relief fund nem sen lakh 1 tenla agütsüogoo aser Hima Das-ia Assam's COVID-19 relief fund nem ita ka indang la itasen tenla agütsütem nanzükogoo.

Maneni PV Sindhu-ia sen lakh 10 tenla agütsüogoo. Sindhu-i Andhra Pradesh aser Telangana Chief Minister Relief Funds nem sen lakh pongungu tenla agütsütem.

Wrestler Bajrang Punia, shiba Railways nung OSD ama inyaker pai Haryana coronavirus relief fund nem ita trok atema pa itasen tenla agütsüogoo

Board of Control for Cricket in India (BCCI)-i, PM-CARES nem sen crore 51 tenla agütsüogoo aser Suresh Rainia-ia PM-CARES atema sen lakh 31 aser Uttar Pradesh CM's Disaster Relief Fund nem sen lakh 21 tenla agütsüogoo. India nunger nungtugu cricket asayar Sachin Tendulkar-i Hokolbarnü sen lakh 50 tenla agütsüogoo.

Ita tetenzüklen Mary Kom mepetmesü nung densema liasü. World Health Organisation (WHO)-i anogo 14 quarantine asütsü asoshi tuyuba sülen manidakba atema la aija liasü.

Mary Kom, shiba Amman, Jordan nung Asia-Oceania Olympic qualifiers nung shilem agia liasü la March 13 nü ki tonga aru aser la anogo 14 kidang nungi marakzüi lokti nung shilem magitsü liasü. Ajisüaka March 18 nü Rashtrapati Bhavan nung tir Ram Nath Kovind-i ayonga sentong nung la oa aden.

Dimapur, Metsüremi/March 30 (TYO): Covid-19 tashidak pokteter prokshia aoba ajanga puti otsü nung tensa tamajung ka ajanga aoba mapang meimchir ajak longjemer iba den raratsü nungdaka kümogoo. Iba amla tensa ka nung alima ajung nung sorkar temi tia tamajungba nungi jenbotsü atema jenjang balala agia arudar.

Linük nung tang ataloker aliba aser taratsütem lung dang yur Board of Control for Cricket in India *BCCI) aser affiliated State Association temi PM CARES Fund nem sen crore 51 ka tenla agütsütem teletetba agiogo. Nagaland Cricket Association (NCA)-ia state sorkar nongita yaritsü atema Chief Minsiter Relief Fund nem sen lakh 5 tenla agütsüogoo. COVID-19 tashidak anema raratsü asoshi tashi itshitsü aser ajungmesotsü atema aser linük

nung nürtem kümzüka toktsütsü nükjidong nung iba teletetba agiogo.

BCCI den State Associations temi maneni tensa asadanga atatsü aser centre o state sorkar aser tanga state regulatory lokti tentettem nongita yariba den teka amteper inyaksü.

Chief Minister aser pa kübok lenirtem lenisüba kübok state sorkari bendanga agütsütem inyakba atema Nagaland Cricket Association-i kanga pelaba lemsateper. NCA-isa state aser yimtsütem jenjang nung yakbang nung inyakerter, medical professionals aser support staff, police personnel aser ajak ajungtsü meji wadang balala nung inyaker ajak dang kanga pelaba lemsateper, ta Hon. Secretary Hyunilo Anilo Khing-i sangdong ka ajanga metetdaksü.

ITTF-i June 30 nü tashi asayamung ajak thinener

New Delhi, Metsüremi/March 30 (Agencies): International Table Tennis Federation (ITTF)-i June 30 nü tashi sentong yanglua aliba ajak thinena atatsü aser rankings sota atatsü asoshi teletetba agiogo. Alima ajunga nung tashidak tamajung pokteter aliba mapang ka nung tang ITTF-i iba teletetba agiogo.

Coronavirus tashidak pokteter aliba ajanga international table tennis asayamungtem nung kongshiba indang sensak asemtsü asoshi ITTF Executive Committee Deobarnü ajurutepegoo.

"COVID-19 pokteter aliba ajanga tensa mejangjai akümba aser Tokyo 2020 Olympic aser Paralympic Games thinenba sülen ITTF Executive Committee-i, tang sentong yanglua aliba ITTF asayamung aser sentongtem ajak June 30 nü tashi thinena atatsü teletetba agiogo," ta ITTF sangdong ka ajanga metetdaksü.

ITTF-isa, March 2020 tashi nung ranking lists sota atatsü aser asayamung thinenba, senzusenpongtsü tenokdangba agütsütem aliba ajanga tetsükdaksü adokba aser tanga timtem ajuruba tem ajak asadanger temelenshi asoshi teletetba agitsü, ta metetdaksü.

ITTF-i ashiba agi, Hana Bank 2020 World Team Table Tennis Championships anogo melenshiba taruba hopta metetdaksütsü.

Mongolbarnü Tokyo Olympic Games thinentsü asoshi teletetba agiogo aser ITTF-i ashiba agi anogo tasen sangdongba sülen parnoki qualification atema jenjang agishitsü.

Executive Committee-isa, sen ajema indoktsü teletetba agi aser senior staff temi itasen ajemer agitsü asoshi mulunga lir, ta ashi.

Maneni ken o balala lemteptsü asoshi April 15 nü ITTF senden ka amentsü lemteptegoo.


Ni Spurs toktsütsü akok: Harry Kane

Metsüremi/March 30, 2020 (Agencies): Tottenham Hotspur striker Harry Kane-i Deobarnü ashiba agi, pai imlaba ama par tema tejakleni mora club toktsütsü akok, kechiyong pai trophy kokner, ta ashi.

2014 küm team nung züngoksema tongtibang shilem agi tenzükba sülen Kane-i Spurs pur atema tetokteba ajak nung goal 181 idaktsür lir, saka pai tang tashi nung team den külemi takok marnok ka danga kokteta mali.

England striker-i 2018 küm, küm trok atema tenanzüktepeba ka yanglushiogoo aser pa 2024 tashi asayatsü, ajisüaka Instagram nung Sky Sports pundit Jamie Redknapp den sensaksemba mapang pai Spurs pur takok ngua mora pa club nung maneni asayatsü masayatsü mejangja, ta shiogo.

"Ni Spurs pur teti meimtsü. Team ka ama onok tejakleni mora mesera lenmang shidaki mora ni club nung tenütem agidangbo madentsü ta shia



aruogoo," ta Kane-i ashi.

"Ni maneni renloka onüba asayar ka lir aser ni tajungba kümner. Ni temaba jenjang nung asayar ka kümner, anungji team ka ama onok koda renloka aoer iba dak ajak keta lir.

"iba ya tejangja masü, ni club nungi dang asayatsü akok mesera toktsütsü akok, kecha shiteta mali," ta pai ashi.

Kane asoshi takok marok koktetsü atema maongkaji 2015 küm League Cup final aser taoba season Champions League final dang liasü.

"Spur puri takok marok koktetsü ta küm ka ana shia arudar. Onok team kanga

tajung saka kuli kar ajanga onoki takok marok monguteti arudar.

"Asayar ka ama aser nisung ka ama iba ya tasak lir.. Ni inyakba ajak nung takok nguner. Ni takaratiba nung takok maroktem kokner," ta pai ashi.

Spurs pur iba season cup tetoktepeba ajak nungi tsükogoo aser league nunga jenjang tibuba nung lir.

Kane hamstring yiruba ajanga masayai liasü aser taruba ita nungi asayatsü imlaa liasü ajisüaka coronavirus tashidak pokteter aliba ajanga April 30 nü tashi iba asayamung thinena lir.

Olympic Games July 23 nungi tenzüktsü

Tokyo, Metsüremi/March 30 (Agencies): Japan nung asayamung achayangertem aser International Olympic Committee (IOC)-i Hombarnü Tokyo Olympic Games 2021 küm July 23 nungi tenzükba August 8 tashi asayatsü asoshi teletetba agiogo, ta Kyodo news sangdong ka ajanga metetdaksü.

Coronavirus kanga kar prokshia aoba ajanga iba asayamung taoba hopta thinena liasü.

Modern Olympics puti otsü nung küm 124buba nung tang mezüngbuba iba asayamung thinenogoo koba Japan asoshi takoksa tulu lir kechiyong parnoki USD billion 13 bo indokogoo aser domestic sponsor

tem nungi USD billion 3 dang aazük.

Hombarnü Games' chief executive, Toshiro Muto-i ashiba agi, 2020 Games atema ticket alir aliba taruba küm asayaba mapang amshidaksütsü mesera asaya mapang melenshira sen meyipa agütsütsü asoshi committee-i asadangdar.

Asayamung thinenba ajanga senotsü talila bendenloksü akok saka iba indang tangbo shia matatetsü, ta Muto-i ashi. Coronavirus tashidak kanga prokshia aoba mapang ka nung asayartertem aser lokti tentet balalai tebilemstü kaa bilemba lemsatepeba sülen IOC aser Japan sorkari Brehostibarnü iba asayamung thinentsü asoshi teletetba agia liasü.

BILEMDANGANG

"Tebilemdangba aser mapa na meputepa ajak amajok"